

中華民國卅七年三月十九日收到

沈子善 編著

王羲之研究


正中書局印行




晉王羲之像



蘭亭遺蹟



(幅八) 圖 詠 觴 亭 蘭





晉王羲之喪亂帖

羲之頓首喪亂之後
先墓再離荼毒追
惟酷甚痛兼摧絕
痛歎心肝痛者數
日乃能即情復未獲
喜觀新毒益深憂
少後紙後更

一 王羲之年表



(南)

晉大興四年辛巳(公元三三二年)先生生

咸和六年辛卯(公元三三二年)先生十一歲

永昌元年壬午(公元三三二年)先生二歲

咸和七年壬辰(公元三三二年)先生十二歲

太寧元年癸未(公元三三三年)先生三歲

咸和八年癸巳(公元三三三年)先生十三歲

太寧二年甲申(公元三三四年)先生四歲

咸和九年甲午(公元三三四年)先生十四歲

太寧三年乙酉(公元三三五年)先生五歲

咸康元年乙未(公元三三五年)先生十五歲

咸和元年丙戌(公元三三六年)先生六歲

咸康二年丙申(公元三三六年)先生十六歲

咸和二年丁亥(公元三三七年)先生七歲

咸康三年丁酉(公元三三七年)先生十七歲

咸和三年戊子(公元三三八年)先生八歲

咸康四年戊戌(公元三三八年)先生十八歲

咸和四年己丑(公元三三九年)先生九歲

咸康五年己亥(公元三三九年)先生十九歲

咸和五年庚寅(公元三三〇年)先生十歲

咸康六年庚子(公元三四〇年)先生二十歲

咸康七年辛丑(公元三四一年)先生二十一

歲

永和四年戊申(公元三四八年)先生二十八

咸康八年壬寅(公元三四二年)先生二十二

歲

永和五年己酉(公元三四九年)先生二十九

建元元年癸卯(公元三四二年)先生二十三

歲

永和六年庚戌(公元三五〇年)先生三十歲

建元二年甲辰(公元三四四年)先生二十四

歲

永和七年辛亥(公元三五一年)先生三十一

永和元年乙巳(公元三四五年)先生二十五

歲

永和八年壬子(公元三五二年)先生三十二

永和二年丙午(公元三四六年)先生二十六

歲

永和九年癸丑(公元三五三年)先生三十三

永和三年丁未(公元三四七年)先生二十七

歲

永和十年甲寅(公元三五四年)先生三十四

歲(書蘭亭序)

歲

永和十一年乙卯(公元三五五年)先生三十

五歲

永和十二年丙辰(公元三五六年)先生三十

六歲

升平元年丁巳(公元三五七年)先生三十七

歲(書黃庭經)

升平二年戊子(公元三五八年)先生三十八

歲

升平三年己未(公元三五九年)先生三十九

歲

升平四年庚申(公元三六〇年)先生四十歲

升平五年辛酉(公元三六一一年)先生四十一

歲

隆和元年壬戌(公元三六二年)先生四十二

歲

興寧元年癸亥(公元三六三年)先生四十三

歲

興寧二年甲子(公元三六四年)先生四十四

歲

興寧三年乙丑(公元三六五年)先生四十五

歲

太和元年丙寅(公元三六六年)先生四十六

歲

太和二年丁卯(公元三六七年)先生四十七

歲

太和三年戊辰(公元三六八年)先生四十八

歲

寧康三年乙亥(公元三七五年)先生五十五

歲

太和四年己巳(公元三六九年)先生四十九

歲

太元元年丙子(公元三七六年)先生五十六

歲

太和五年庚午(公元三七〇年)先生五十歲

太元二年丁丑(公元三七七年)先生五十七

太和六年(改元咸安)辛未(公元三七一年)

歲

先生五十一歲

太元三年戊寅(公元三七八年)先生五十八

咸安二年壬申(公元三七二年)先生五十二

歲

歲

太元四年己卯(公元三七九年)先生五十九

寧康元年癸酉(公元三七三年)先生五十三

歲是年卒

歲

寧康二年甲戌(公元三七四年)先生五十四

歲

一一 緒 說

我國書史源遠流長，專門典籍汗牛充棟，名家鉅子，車載斗量，若一一考證，則非個人精力所能及，故先擇其最重要之時代與最著名之書家加以研討，自來論書者無不交稱魏晉，且又競推王羲之爲書聖，雖市井之徒亦無不知王羲之之名，其實彼等何嘗窺見羲之字蹟，且或未知羲之爲何代人物，不過耳熟能詳，信口而出耳，羲之誠我國唯一之書家，亦唯一之美術家也，羲之雖享身後之名，惜除少數書家文士外，一般人士對此偉大美術家之生平與造詣，則未嘗瞭解，歷代書學專籍中之論及羲之事蹟者，又復散漫零碎，不易使閱者獲得明確之概念，本書之作，蓋在稽考舊籍，略加整理，使羲之事蹟得一清晰之體系，以便流傳，亦尊崇書聖之一道也。

三 王羲之之家世

王羲之字逸少琅琊臨沂人（註一）司徒導之從子也。祖正尚書郎父曠淮南太守生晉太興四年（公元三二一年）民元前一五九一年卒晉太元四年（公元三七九年）民元前一五三三年）年五十九歲位右軍將軍會稽內史贈紫金光祿大夫諸子遵父先旨固讓不受妻郗氏甚工書有七子知名者五人玄之早卒次凝之（字叔平）工艸隸仕歷江州刺史左將軍會稽內史次渙之次徽之（字子猷）黃門侍郎次肅之（字幼恭）次操之（字子重）工艸隸歷侍中尚書豫章太守次獻之（字子敬）生晉建元二年（公元三四四年）民元前三四四年卒太元一三年（公元三八八年）民元前一五二四年）年四十五歲歷建威將軍吳興太守徵中書令特贈侍中光祿大夫卒諡曰「憲」善書如其父時人稱爲「二王」凝之妻謝道韞有才華亦善書甚爲舅所重。

王氏自羲之以後繩繩弗替藝苑蜚聲世濟其美茲錄其世系以見君子之澤。

王氏世系既述之如上，茲更將各人生卒年之可考者，爲之列表，以備參考。(註一)舊名蘭山爲山東

臨沂府治

王氏皆琅琊臨沂人不列籍貫欄

姓名	字號	歲數	生年	卒年	年數	支干	公元	年	民元前	備考
王融			號融號	號融號	年數	支干	公元	年	民元前	備考
王祥	休徵	八五	漢中平	晉太始	二	丑乙	一八五	一三七	晉太始	五 丑己
王覽	元通	七三	漢憲安	晉咸寧	十一	戌丙	二〇六	二七九	晉咸寧	四 戌戊
王渾										
王羲										
王裁										
王正										
王會										
王戎	濬仲	七二	蜀後建興	晉惠永興	一二	寅甲	二二〇	二九六	晉惠永興	二 丑乙

王	行	夷甫	五六	蜀後延	一九	子丙	二五	二六	晉懷永	五	未辛	三一	二六
王	詔	道深	四四	晉武泰	五	丑己	二九	二〇	晉懷永	六	申壬	三三	二〇
王	導	茂弘	六四	晉武泰	三	亥丁	二七	二五	晉成和	五	寅庚	三〇	二五
王	曠	世將	四七	晉武咸	二	申丙	二五	二六	晉元永	元	午壬	三三	二五
王	彬												
王	舒												
王	邃												
王	舍												
王	敦		五九	晉武泰	二	戌丙	二六	二七	晉明泰	二	申甲	三四	二六
王	玄												
王	徽												
王	稅												

王羲之之家世

王愔 敬豫 三六 晉愍建 二 戊甲 三四、一五六 晉穆永 五 酉己 一四九、一五五

王洽 敬和 三六 晉明太 元 未癸 三三 一五九 晉穆升 二 午戊 一五八、一五九

王劭

王薈

王籍之

王羲之 逸少 五九 晉元太 四 巳辛 三二 一六一 晉武太 四 卯己 一五九、一五五

王胡之

王着之

王族之

王彭之

王彪之 叔武 七三 晉惠永 二 丑乙 三〇 一六七 晉武太 二 丑丁 一三七、一五五

王允之 深猷 四〇 晉惠初 元 亥癸 三三、一六九 晉成威 八 寅壬 一四三、一五〇

王應

王混

王珣 元珣 五二 晉穆永 六 戌庚 三〇 一五二 晉安隆 五 丑辛 四二 一五一

王穆 穆遠 四八 晉穆升 四 申庚 三〇 一五一 晉安隆 三 未丁 四七 一五〇

王獻 王玄之 王凝之 王涣之 王肅之 王徽之 王操之 王獻之 子敬 四五 晉康建 二 辰甲 三〇 一五一 晉武太 一三 子戊 三六 一五〇

王獻之 王和之 王茂之 王隨之

王羲之 之 家 世

晉安隆 三 亥己 三九 一五三

王羲之 之 家 世

王羲之研究

王偉之

王臨之

王弘

王徽

王曇首

王遠

王僧朗

王球

王答

王惠

王楨之

王淳之

王靖之

王裕之

王鎮之

敬宏

八八

晉穆升
帝平

三

未己

三

一五

宋文元
帝嘉

二三

戌丙

四

一四六

三七

晉武太
孝帝元

一九

午甲

五

一五八

宋文元
帝嘉

七

午庚

四〇

一四八

宋文元
帝嘉

九

申壬

四三

一四〇

王弘之	方平	六三	晉 <small>袁興</small> 帝 <small>寧</small>	三	丑乙	一四七	宋 <small>文帝</small> 嘉	四	卯丁	一四七	一四七
王韶之	休泰	五六	晉 <small>孝太</small> 武 <small>帝</small> 元	五	辰庚	一四三	宋 <small>文帝</small> 景	一二	亥乙	一四五	一四七
王僧綽											
王僧虔		六〇	宋 <small>文帝</small> 元	三	寅丙	一四六	齊 <small>武帝</small> 永	三	丑乙	一四五	一四六
王僧佑											
王楮											
王曠											
王粹											
王悅之											
王恢之											
王瓚之											
王羅雲											
王儉	仲實	三八	宋 <small>文帝</small> 元	二九	辰壬	一四三	齊 <small>武帝</small> 永	七	巳巳	一四九	一四三
王彬											

王羲之之家世

王羲之研究

王楫

王慈

王志

王籍

王奐
彦孫

王蘊

王份

王晏

王思遠

王濤
思叔本
字元成

王筠
元體
六九
齊高祖元

王參
孝伯

王肅

四九
宋文帝元

二九

辰壬

一〇

一〇

齊東昏侯元

二

辰庚

五〇

一〇

四九
宋廢帝元

二

寅甲

一〇

一〇

梁武帝通

三

寅壬

五三

一〇

六九
齊高祖元

三

酉辛

一〇

一三

梁武帝清

三

巳己

五九

一三

晉安隆帝

二

戌戊

三九

一五

齊東昏侯元

三

齊武帝明

一一

酉癸

四三

一四

王規 威明 四五 齊武帝永 十 申 一四〇 梁武帝大同 二 辰 一五

王孝賓

王智權

王智永

王褒 子淵 六四

王方慶

王光輔

王陵

四 王羲之之生活及其人格

(一)幼年生活 羲之幼訥於言人未之奇年十三嘗謁周顓顓察而異之時重牛心炙坐客未噉顓先割啗羲之於是始知名及長辯瞻以骨鯁稱尤善隸書為古今之冠論者稱其筆勢以為飄若浮雲矯若驚龍深為從伯敦(王敦)導(王導)所器重時陳留阮裕有重名為敦主簿敦嘗詔羲之曰「汝是我家佳子弟當不減阮主簿裕」亦目羲之與王承(王湛子字安期歷官元帝鎮東府從事

王羲之之生活及其人格

中郎)王悅(王導子字長豫中書侍郎)爲王氏三少於此亦可見羲之在幼年已負盛名矣。時太尉郗鑒(字道徽龍驤將軍兗州刺史)使門生求女婿於導(按卽求女婿於王導之子弟)導令就東廂徧觀子弟門生歸謂鑒曰「王氏諸少并佳然聞信至咸自矜持惟一人在東床坦腹食獨若不聞」鑒曰「正此佳婿耶」訪之乃羲之也遂以女妻之。

(二)從政生活 羲之起家秘書郎征西將軍庾亮請爲參軍累遷長史亮臨薨上疏稱羲之清貴有鑒裁乃遷寧遠將軍江州刺史羲之既少有美譽朝廷公卿皆愛其才器頻召爲侍中吏部尙書皆不就復授護國將軍又推遷不拜於此亦可知羲之之淡於仕進矣嗣以揚州刺史殷浩再三敦勸乃拜護軍又苦求宣城郡不許乃以爲右軍將軍會稽內史時殷浩與桓溫不協羲之以國家之安在於內外和因與浩書以誠之浩不從及浩將北伐羲之以爲必敗以書止之言甚切至後浩果爲姚襄所復羲之對於政治生活雖無若何興趣然於國家安危之際能識其大體且能向當道痛陳得失者則又非一般從事於政治工作者所可幾及後浩復圖再舉羲之更以大義責之遺殷浩書曰「知安西敗喪公私惋怛不能須臾去懷以區區江左所營綜如此天下寒心固以久矣而加之敗喪此可熟念往事豈復可追願思弘將來令天下寄命有所自隆中與之業政以道勝寬和爲本……自寇亂以

來處內外之任者。未有深謀遠慮。括囊至計。而疲竭根本。各從所志。竟無一功可論。一事可記。忠言嘉謀。棄而莫用。遂令天下。將有土崩之勢。何能不痛心悲慨也。……宜更虛已求賢。當與有識共之。不可復令忠允之言。常屈於當權。使君起於布衣。任天下之重。尙德之舉。未能事事允稱。當重統之任。而喪敗至此。恐閭朝羣賢。未有與人分其謗者。今亟修德補闕。廣延羣賢。與之分任。尙未知獲濟所期。若猶以前事爲未工。故復求之於分外。宇宙雖廣。自容何所知言。不必用。或取怨執政。能當情慨所在。正不能不盡懷極言。若必窮征。未達此旨。果行者。愚智所不解也。願復與衆共之。」又與會稽王。論陳浩不宜北伐。并病陳時事。其原書中有云。「……以區區吳越。經緯十分之九。不亡何待。而不度德量力。不弊不已。此封內所痛心歎悼。而莫敢吐。誠往者不可諫。來者猶可追。願殿下更垂三思。解而更張。令陳浩苟羨。還據合肥。廣陵。許昌。譙郡。梁彭城諸軍皆還。保淮爲不可勝之基。須立勢舉謀之未晚。此實當今策之上者。若不行此。社稷之憂。可計日而待。……」其痛切陳詞。憂時愛國之情。溢於字裏行間。是時東土饑荒。羲之輒開倉賑貸。然朝廷賦役繁重。吳會尤甚。羲之每上疏爭之。其愛卹貧民之心。更非當時執政者所可幾及。

(三) 辭官經過 羲之在官之日。對治國大計。民間疾苦。無不就其觀感所及。向當道痛陳利害。

以維繫東晉偏安之局。惟以素性不樂從政。故初渡浙江。便有終焉之志。會稽有佳山水。名士薈萃。謝安未仕時。亦嘗居彼。士孫綽（晉太原中都人。字與公。居會稽游放山水十餘年。作遂初賦以寄其意）李充許詢支遁等。皆以文義冠世。并築室東土。與羲之同好。羲之於永和九年三月三日。與同志宴集會稽山陰之蘭亭。羲之自爲之序。以申其志。其風神瀟灑。不滯於物之心靈。可以想見。嗣復於永和十一年（公元三五三年）稱病辭官。并告誓於其父母之墓。情詞懇摯。意態堅決。其告誓詞。卽世稱之。告誓文也。晉書王羲之傳。稱羲之因不得志於當時而辭官。此種論斷。殆未知羲之之性靈。似近污辱其人格。是不可以不辯。右任先生亦嘗以晉書所記爲羲之叫屈。其告誓文曰。

「維永和十一年三月癸卯朔九日辛亥。小子羲之。敢告二尊之靈。羲之不天。夙遭閔凶。不蒙過庭之訓。母兄鞠育。得漸庶幾。遂因人乏。蒙國寵榮。進無忠孝之節。退違推賢之義。每仰詠老氏周任之誠。常恐死亡無日。憂及宗室。豈在微身而已。是用庸碌。永歎若墜深谷。止足之分。定之於今。謹以今月吉辰。肆筵設席。稽顙歸誠。告誓先靈。自今之後。敢渝此心。貪冒苟進。是有無尊之心。而不子也。子而不子。天地所不覆載。名教所不容。信誓之誠。有如皦日。」

朝廷以羲之對從政誓苦。亦不復徵之。羲之既去官。與東土人士營山水戈釣之樂。遊名山泛滄

海歎曰：「我卒當以樂死。」此種一往情深對於宇宙已能體會到至深之處，領略真樂，亦絕非淺俗薄情之人所能體驗者。

(四)王羲之之人格 晉代係中國史上特殊之朝代，王羲之之人格之形成，與當時之時代背景，有密切之關係，故首述當時時代背景。

漢末魏晉六朝，為中國政治上最混亂，社會上最痛苦之時代，然却為精神上極自由極解放，最富智慧之時代，故在藝術上之表現，亦為前代所無，如王羲之之書法，前無古人，奠定後代根基，即其明證。羲之之人格之表現，分析言之，殆有三點：

一、羲之愛賞自然，能達到最深刻之境界，如云：「從山陰道上行，如在鏡中游。」此種以虛靈之心襟，玄學之意味，體會自然，非心晴朗澄之晉人，如王羲之者，絕不能有此心境，所謂「欣賞山水，由實入虛，即實即虛，超入玄境。」是也。

二、羲之行草書法，可為其風神瀟灑人格之藝術的表現，行草藝術，純係一片神機，無法而有法，全在下筆時點畫自如，一點一畫，皆有情趣。（世稱羲之書法萬字不同）如「天馬行空，游行自在」，苟非晉人，苟非羲之，絕不能心手相應，登峯造極。

三、東晉一般士人雖超然物外，然大都未能忘情。如王戎云：「情之所鍾，正在我輩。」世說新語傷逝篇記述晉人對於朋友之愛，無不充分表現。人格上「情」之一字，王羲之既去官與東土人士營山水戈釣之樂，遊名山泛滄海，歎曰：「我卒當以樂死。」此種哀樂過人，不同流俗之「情」的表現，苟非晉人，苟非羲之，絕難做到。蓋深於「情」者，不僅對宇宙（自然）能體會極深，即對人情哀樂，亦能體驗深入肺腑也。

綜上數點言之，王羲之之人格，充滿「美」的成分，為「美之極」之人格。凡美之極者，即雄強之極。故羲之書法，乃「字勢雄逸，如龍跳天門，虎臥鳳闕。」羲之不特具有「美之極」之性靈，觀其一再止揚州刺史殷浩北伐之書（見上節從政生活），更可知羲之之為人矣。識以先物，仁以及民，忠以謀國，哲以保身，有是四者，殆非一世翰墨之士，所可擬其倫也。

五 王羲之書法之理論

羲之之書在當時已見重於世，後人視比金玉，尤為珍貴，即不甚經意之作，亦被人寶藏。此雖以其風神瀟灑，不滯於物之性靈發而為超妙之書藝，然學養功深，乃為其造成書聖境界之主因。後之

學者固未可人人希異成爲羲之。但於羲之論書之道，必略知其概梗，殆亦「取法乎上，僅得乎中」之意云爾。羲之論書，可於其著作中得之。傳世之著作有：

一、題衛夫人筆陣圖後——見唐張彥遠法書要錄

二、右軍筆陣圖（書付與子敬者）——見馮武書法正傳

三、王右軍筆勢論——見清馮武書法正傳

四、王羲之論書——見唐張彥遠法書要錄

五、右軍書法——見唐張彥遠法書要錄

六、右軍述天台紫真傳授筆法——見唐張彥遠法書要錄

茲從羲之著作中，述羲之書法之理論如次。

（一）論結構

結構之道，隨字附形，長短廣狹，疏密肥瘦，各有其態，不有結構，安可成形。

羲之論結構之理論有四點：

一、「務以平穩爲本。分間布白。上下齊平。均其體製。大字促之令小。小字寬之令大。」

二、「凡事處其中。畫之法。皆不宜倒其左右。右廂復宜寬於左畔。橫貴乎纖。豎貴乎籊。分間布白。遠近宜均。上下得所。自然平穩。」

三、「腹不宜促。短也。脚不宜賒。長也。體不宜斜。重不宜長。單不宜小。雙不宜大。密勝乎疏。短勝乎長。不得上寬下窄。不宜傷密。密則似痾。瘵纏身。不舒展也。不宜傷疏。疏則似溺。小之禽。慢也。不宜傷

長。長則似死蛇掛樹。腰肢無力。不宜傷短。短則似壓死蝦蟆。言匾闊也。

四、「莫以字小易而忙行筆勢。莫以字大難而慢展毫端。」

(一) 論執使

執筆之法。謂之執使。執謂執筆。使謂運用。故唐孫過庭有執使轉用之法。宋姜夔云「執謂淺深長短。使謂縱橫牽掣。轉謂鉤環盤紆。用謂點畫向背。」

羲之論執使之理論有二點

一、「凡學書先學執筆。若真書去筆頭一寸二分。草書去筆頭三寸一分。」

二、「用筆着墨不過三分，不得深浸，致毛弱無力也。」

(三) 論利器

上古無筆墨，以竹挺點漆書於竹木之上，竹剛漆膩，畫不能行，首重尾輕，形如科斗，故曰科斗書。後世筆墨既有，書學日盛，字體屢更，學者必求筆墨之良者用之，又知所以用之之道，方可致力而臨池之功成。

羲之論利器之理論有三點。

一、「紙剛用軟筆，紙柔用硬筆，純剛則如錐畫石，純柔則如泥洗泥，既不圓暢，神格亡矣，畫壁及石同紙剛例，蓋相得也。」

二、「書弱紙用強筆，書強紙用弱筆，強者弱之，弱者強之。」

三、「學書之法，先乾研墨，凝神靜慮，預想字形，大小偃仰，平直振動，令筋脈相連，意在筆前，然後作字，若平直相似，狀如算子，上下方整，前後齊平，此不是書，但得其點畫耳。」

六 王羲之書法成名之由來

羲之書法之成名殆有數因

一曰時代關係。自漢末蔡邕出世以來，書藝大進，繼以張芝、韋誕、崔實、鍾繇等書家輩出，研究改進，蔚爲大觀。至王羲之而集衆家書法之大成，所謂「超詣衆妙，古今不可比倫，用意精微，落筆詳緩，一點一畫，無不皆有法度，揮毫縱心，不踰於規矩，既無適當，亦無不及，增之失於有餘，損之失於不足，作字有八面變態之妙，如蛟虬之騰，鸞鳳之翔舞，燦然溢紙，飛動眩目，亦猶仲尼之道，出乎其類，拔乎其萃，自生民以來，未之有也。」至於羲之筆法之所宗，據唐張彥遠法書要錄云：實淵源於漢之蔡邕，蔡邕受於神人而傳之崔瑗，及女文姬，文姬傳之鍾繇，鍾繇傳之衛夫人，衛夫人傳之王羲之。（其後羲之傳之王獻之，王獻之傳之外甥羊欣，羊欣傳之王僧虔，王僧虔傳之蕭子雲，蕭子雲傳之僧智永，智永傳之虞世南，虞世南傳之歐陽詢，詢傳之陸柬之，柬之傳之姪彥遠，彥遠傳之張旭，旭傳之李陽水，陽水傳徐浩，顏真卿，鄔彤，韋玩，崔邈，凡二十有三人。）茲以傳授系統表表之如次。

神(一) 蔡(二) 崔(三) 蔡(四) 鍾(五) 衛(六) 王(七) 王(八) 羊(九) 王(十) 蕭(十一) 虞(十二) 歐(十三) 陸(十四) 張(十五) 李(十六) 徐(十七) 顏(十八) 郭(十九) 章(二十) 崔(二十一)
 人 邕 瑗 姬 繇 人 之 欣 虔 雲 永 南 詢 之 遠 旭 冰 浩 卿 彤 玩 邁

羲之初學衛夫人書，已有名筆之譽。及渡江北游，見李斯曹喜書，繼又見鍾繇、梁浩書及蔡邕石經、張昶華岳碑，遂改本師，博習衆碑，而書學大進。

二曰歷代帝王推崇之故。羲之之書爲歷代帝王推崇備至。如唐太宗命虞世南諸遂良鑒定羲之書迹真偽，分別收藏於御府者達二千二百九十紙之多，并於臨崩之際，遺命以蘭亭真蹟陪葬昭陵。梁武帝蒐集二王書達萬五千紙以上。宋高宗於羲之書尤不忘於心手。（見宋高宗翰墨志）自此以後，羲之墨蹟愈稀，而愈爲歷代帝王所珍貴。因帝王之珍視與提倡，而羲之書聖之地位，即不易動搖矣。

七 王羲之書跡目錄及其著名書跡考證

翰墨之美多以身後騰聲二王（羲之獻之）之書當時見貴，獻之嘗與簡文帝（公元三七

一至三七二年）十紙。題最後云：「下官此書，甚合作，願聊存之。」此書爲桓玄所寶，玄愛重二王，不能釋手。乃選縑素及紙書正行之尤美者，各爲一帙，常置左右。及南奔，雖甚狼狽，猶以自隨。將敗，并投於江。晉代裝書，真草渾雜，背紙皺起。宋（劉宋）孝武帝（公元四二〇至四二二）又使徐爰治護，十紙爲一卷。明帝（公元四六五至四七二）科簡舊秘，并遣使三吳鳩集散逸，詔虞和、巢尚之、徐希秀、孫奉伯等更加編次，咸以二丈爲度。二王縑素書，珊瑚軸二帙，二十四卷。紙書金軸二帙，二十四卷。又紙書玳瑁軸五帙，五十卷。并金題玉躔織成帶，又扇書二卷。又紙書飛白、章草二帙，十五卷。并旃檀軸，又紙書戲字一帙，十二卷。并書之冠冕也。自此以下，別有二品書，凡五十二帙，五百二十卷。并旃檀軸，其新購獲者爲六帙，一百二十卷。綜上所述，二王書跡爲數不少。既經喪亂，多所遺失。梁大同中（公元五三五至五四五）武帝勅周興嗣撰千字文，使殷鐵、石模次羲之之迹，以賜八王。右軍之書，咸歸梁室。當時武帝搜訪天下，大有所獲。以舊裝堅強，字有損壞。天監中（公元五〇二至五一八）復勅朱异、徐僧權、唐懷允、姚懷珍、沈織文、枘而裝之，更加題檢。檢二王書大凡七十八帙，七百六十七卷。并珊瑚軸織成帶，金題玉躔。其後隋大業末年（約公元六一六年）煬帝幸江都，祕府圖書多將從行。中道船沒，大半淪棄。大內所藏二王遺跡，料亦隨之喪失不尠。逮至唐代，太宗卽位，政治武備之外，擅

長文學書法尤爲精美。特好羲之之書。據唐張懷瓘《二王等書錄載》「貞觀十三年。勅購求右軍書。并貴價酬之。四方妙蹟。靡不畢至。勅起居郎褚遂良。校書郎王知敬等。於玄武門西長波門外科簡內。出右軍書。相共參校。令典儀王行真裝之。梁朝舊裝紙見存者。但裁翦而已。右軍書大凡二千二百九十紙。裝爲十三帙。一百二十八卷。真書五十紙一帙。八卷。隨本長短爲度。行書二百四十紙。四帙。四十卷。四尺爲度。草書二千紙。八帙。八十卷。以一丈二尺爲度。并金縷雜寶裝軸。織成帙。其書每縫皆用小印印之。」及唐玄宗時。羲之遺迹存者。據唐徐浩《古蹟記載》「……玄宗開元五年（唐玄宗年號公元七一七年）十一月五日。收綴大小二王真迹。得一百五十八卷。大王正書三卷（黃庭經第一。畫讚第二。告誓第三）。行書一百五卷。草書一百五十卷。小王書都三十卷。正書兩卷。」是羲之書蹟已較昔爲少。又較唐章述《敍書錄載》「開元十六年（公元七二八年）五月內出二王真蹟及張芝張昶等真跡。總一百五十餘卷。……右軍書凡二百三十卷。小王二十八卷。張芝張昶書各一卷。」是時羲之之書。散佚甚多。據《敍書錄》稱。右軍真行。唯有黃庭。告誓等四卷存焉。蕭令尋奏滑州人家藏右軍扇上真上宣示。及小王行書白騎遂等三卷。勅命滑州給驛齋書本赴京。其書扇有貞觀舊標。織成題字。奉進上書本。留內賜絹一百疋。以遣之。竟亦不問得書所由。羲之墨蹟傳之唐代。雖散佚不少。然猶

有可觀。洎乎宋代，則所存有限。據宋俞松蘭亭續考卷二云：「……右軍遺墨流傳至國初者，尙數十紙……」宋人眼光中數十紙羲之墨蹟，猶復珍貴，以視前代，搜羅之富，則相形見拙矣。羲之真蹟流傳至今，尙在人間者，僅有喪亂帖（係唐代流傳日本）及快雪時晴帖（恐係唐人雙鉤墨蹟，現存故宮博物院）。其餘或爲真迹刻石之本，或爲歷代書家臨摹翻刻之本，均非廬山真面。今之研究大王書法者，但求摹刻較佳之帖，於願足矣。茲將唐太宗貞觀間所集右軍墨蹟，列爲右軍書記。以見右軍墨蹟之大概。則吾人雖屬望洋興嘆，亦可略知右軍書迹之梗概。至書目中爲右軍得意之作，則於書記後擇要加以考證，兼述其源流，以爲治斯學者之玩味。

（甲） 右軍書記

十七帖長一丈二尺，卽貞觀中內本也。一百七行九百四十二字，是烜赫著名帖也。太宗皇帝購求二王書，大王草有三千紙，率以一丈二尺爲卷，取其書迹及言語以數相從，綴成卷，以貞觀兩字爲二小印印之，著河南監裝背，率多紙檀軸首，白檀身，紫羅織成帶，開元皇帝又以開元二字爲二小印印之，跋尾又刻當時大臣等十七帖首，以卷首有十七日字故號之。二王書後人亦有取帖內一句語稍異者，標爲帖名，大約

多取卷首三兩字及帖首三兩字也。

(一)十七日先書郗司馬未去即日得足下書爲慰先書以具示復數字

(二)吾前東粗足作佳觀吾爲逸民之懷久矣足下何以方復及此似夢中語耶無緣言面爲歎書何能悉

(三)瞻近無緣省告但有悲歎足下大小悉平安也云卿當來居此喜遲不可言想必果言告有期耳亦度卿當不居京此旣僻又節氣佳是以欣卿來也此信言量具示司

(四)龍保等平安也謝之甚遲見卿舅可早至爲簡隔也

(五)知足下行至吳念遠離不可居叔當西耶遲知問計與足下別廿六年於今雖時書問不解闊懷省足下先後二書但增歎慨頃積雪凝寒五十年中所無想頃如常冀來夏秋間或復得足下問耳比者悠悠如何可言吾服食久猶爲劣劣大都比之年時爲復可耳足下保愛爲上臨書但有惆悵

(六)省足下別疏具彼土山川諸奇揚雄蜀都左太沖三都殊爲不備悉彼故爲多奇益令其游目意足也可得果當告卿求迎少人足耳至時示意遲此期真以日爲歲想足下鎮彼土未有動理耳要欲及卿在彼登汶嶺峨帽而旋實不朽之盛事但言此心以馳於彼矣

(七) 諸從竝數有問粗平安唯修載在遠音問不數懸情司州疾篤不果西公私可恨足下所云皆盡事勢吾無間然諸問想足下別具不復一一

(八) 得足下旃罽胡桃藥二種知足下至戎鹽乃要也是報食所須知陛下謂須報食方回近之未許吾此志知我者希此有成言無緣見卿以當一笑

(九) 云譙周有孫高尚不出今爲所在其人有以副此志不令人依依足下具示嚴君平司馬相如揚子雲皆有後否

(一〇) 天鼠膏治耳聾有驗否有驗者乃是要藥

(一一) 朱處仁今何在往得其書信遂不取答今因足下答其書可令必達

(一二) 省別具足下小大問爲慰多分張念足下懸情武昌諸子亦多遠宦足下兼懷竝數問不
老婦頃疾篤救命恒憂慮餘粗平安知足下情至

(一三) 旦夕都邑動靜清和想足下使還一一時州將桓公告慰情企足下數使命也謝無奕外
任數書問無他仁祖日往言尋悲酸如何可言

(一四) 知有漢時講堂在是漢何帝時立此知畫三皇五帝以來備有畫又精妙甚可觀也彼有

能畫者不欲摹取當可不須具告

(一五) 往在都見諸葛顯會具問蜀中事云成都城池門屋樓觀皆是秦時司馬錯所修令人遠想慨然爲爾不信一一示爲欲廣異聞

(一六) 青李來禽櫻桃日給藤已上四行子皆囊盛爲佳函封多不生足下所疏云此果佳可爲致子當種之此種彼胡桃皆生也吾篤喜種果今在田里惟以此爲事故遠及足下致此子者大惠也

(一七) 彼所須此藥草可示當致

(一八) 虞安吉者昔與共事常念之今爲殿中將軍前過云與足下中表不以年老甚欲與足下爲下寮意其資可得小郡足下可思致之耶所念故遠及

(一九) 吾有七兒一女皆同生婚娶以畢惟一小者尙未婚耳過此一婚便得至彼今內外孫有十六人足慰目前足下情致委曲故具示已上十七帖也

(二〇) 玄度先乃可耳嘗謂有理因祠祀絕多感其夜便至此致之生而速之每尋痛惋不能已已省君書增酸恐大分自不可移時至不可以智力救如此

(二一) 先生適書亦小小不能佳大都可耳此書因謝常侍信還令知問可令謝長史且消息

(二二)數親問叔穆嘉賓竝有問爲慰

(二三)知道長不孤得散力疾重而邇進退甚令人憂念遲信還知問

(二四)婦安和婦故羸疾憂之焦心餘亦諸患

(二五)君昨示欲見礪生敍讚今欲默語與廢之格粗當書爾不玄度好佳君謂何似

(二六)從事經過崔阮諸人昨日與書疾故示毒愁當增其疾吾如今尙劣劣又晚食未有定發
日有定示足下興耳近書或欲留吾甚欲與俱而吾疾患遲速無常其竟云何足下今知問

(二七)適太常司州頤軍諸人二十五六書皆佳司州以爲平復此慶之可言餘親親皆佳大爲
以還吳也冀或見之

(二八)司州供給寥落去無期也不果者公私之望無理或復是福得犬等書慰心今因書也野
數言疏平安定太宰中郎

(二九)適州將十五日告徐一癰方尺許口四寸云數如來小如差然疾源如此愛但尙深故遣
信治徐舍人書以示徐還示足下也不堪繹疑事列上台周青州親事今以當至下耶甚是事宜無方
身世而任事者疾患如此使人短氣

(三〇)六月十九日羲之白吏墨等八日書知不佳阿爾耿耿僕日弊而得此熱忽解日爾力遺不具王羲之白白字只成點

(三一)一見尚書書一二日遣信以具必宜有行者情事恐不可委行使耶遲還具問亦以與尚書諮懷今復遣諮吳興也

(三二)遠近清和士人平安荀侯定住下邳復遣軍下城此間民事愚智長款乃亦無所隱如之何又須求雨以復爲災卿彼何似

(三三)江生佳須大活以始見之與人上蕭索可歎

(三四)汝宜速下不可稽留計日遲望今日亦語劉長史令速

(三五)近因得里人書想至知故面腫今差不吾比白食意如差而舒玉篇下諫反堅也中故不差以此爲至患至不可勞力數字令第知聞耳

(三六)姊適復二告安和邾故病篤無復他治爲消息耳憂之深今移至田舍就道家也事畢當吾遣信親淑還母子平安爲慰至恨不得暫見故未得下船道夷書云已得一宅想今安穩耳不致解此移趨知部兒不快何所在今已佳也耿耿信白

(三七) 與殷侯彼此格卿取

(三八) 卒喜慰氣滿無他治噉數合米來三日

(三九) 知足下哀感不佳耿耿吾下勢腹痛小差須用女婁丸得應甚速也

(四〇) 在我而已誠無所多云與謝豫州共入河不乃煩劇得安萬送書云六日可至諸賢云朝廷失之轉覺闕然與卿書同不有君子其能國乎此言深也但云卿當入何以如夢恐卿表將復經年想仁祖差時還內鎮慰人精於皆左卿懷矣

(四一) 產婦兒萬留之月盡遣甚慰心

(四二) 得袁二謝書具爲慰袁生暫至都已還未此生至到之懷吾所盡也第預須遇之大事得其書無已已二謝云秋末必來計日遲望萬贏不知必俱不知第往別停凝日決其美爲樂也尋分旦與江姚女和別殊當不可言也

(四三) 知庚丹陽差數深深致心致心

(四四) 得孔彭祖十七日具問爲慰云襄經還蠹是反善之誠也於殷必得速還無復道路之憂比者尙懸悒得其去月書省之悲慨也

(四五)上流近問不竟何日卽路知謝定出居內所弘故重是不情廢情存大

(四六)明或就卿圍基邑散今兩寒未可以治謝

(四七)江表付還

此四字一行

(四八)得書知足下問吾骯髒

上下籀反下口亞反腸骨

拘闕痛俛仰欲不得此何理耶願輒與相見無盡治宜

足下得益使之不疑也但月又未陰沈沈恐不可針不知何以數月前甚憂頓王羲之

(四九)比信尋知足下有書可道知足下未能得果望近爲然知得家問賢子動疾念甚憂慮懸

得後問不分張何可久幼小故疾患無賴

(五〇)野大皆當以至不將還問懸心大得善悉也野當不能退卿竝轉茂清談

(五一)足下小大佳也諸疾苦憂勞非一如何復得都下近問不吾得敬和二十三日書無他重

照住定爲善

(五二)謝二侯

(五三)山下多日不得復意問一昨晚還未得遣書得告知中冷不解更壯溼甚耿耿服何藥耶

僕此日差勝尋知問王羲之頓首

(五四) 羲之頓首向又慘慘自舉哀乏氣勿勿知便當西且不相知來想熊能更言問力遣不次

王羲之頓首

此三帖帶行

(五五) 七日告期痛念玄度未能關心汝臨哭悲動何可言言及惋寒夜闕市器俱不合用令摧之也吾平平但昨來念玄度體中便不堪之耶告

(五六) 汝當須過殯還恆有悲測

(五七) 王延期省

此四字一行

(五八) 妹轉佳慶不及啼不憶念奴殊不可言涼當迎之

(五九) 昨即得丹陽水上書與足下書同故不送昨諸書付還

(六〇) 去冬遣便想久至乖離忽四年言之歎慨豈言所喻悠悠數十卒當何期汝等將慎爲上知復何云念足下窮思兼至不可居處雨氣無已卿後何似耿耿善將息吾故劣力知問王羲之

(六一) 吾何當還

此四字一行

(六二) 汝尚子愁思兼至不可居處多疾足下前許歲未今暫還想必可爾故復白

(六三) 十一月十三日告期等得所高餘姚并吳興二十八日二疏知並平安慰吾平平比服寒

食酒如似爲佳力因王會稽不一阿耶告知想大小皆佳丹陽頃極佳也云自有書不附此信耳大小問多患懸心想二叔母子佳遲卿問也

(六四)吾去日盡欲留女過吾去自當送之想可垂許一出未知還期是以留意夫人涉道康和足下大小皆佳度十五日必濟江故二日知問須信還知定當近道迎足下也可令時還遲面以日爲歲

(六五)去冬臨臨安事近便欲決去而何侯不許事聞以小寇今未便得果然故有移南意向未可倉卒復信更具信汝也

(六六)六日昨書信未得去時尋復逼或謂不可以不恭命遂不獲已處世之道盡矣何所復言

(六七)丹陽旦送吾體氣極佳在卿故處增思詠

(六八)若可得耳要當須吾自南但憎感寒

(六九)十四日諸問如昨云西有伐蜀意復是大事速送袍來

(七〇)遂當發詔催吾帝王之命是何等事而辱在草澤憂歎之懷當復何言見足下一一

(七一)昨送諸書令示卿想見之恐殷侯必行義望雖宜爾然今此集信爲未易卿若便西者良

不可言

(七二)安復後問不想必停君諸舍疾若差也便疾綿篤了不欲食轉側須人憂懷深小妹亦故進退不孤得散力煩不得眠食至少疾患經日兼焦勞不可言迎集中表親疏略盡實望投老得盡田里骨肉之歡此一條不謝二疏而人理難知此不知小却得遂本心不交衰朽羸劣所憂營如此君視是區養之功當有何理今都絕息此事也冀疾患差末秋初冬必思與諸君一佳集遣無益快其爲樂欲省補頤者之慘盛也追尋前者意事豈可復得且當率目前及當此急要願諸君各保愛以俟此期未近見君有諸結力聊以當面許各間意必欲省安西如今意無前却也想君必俱賊勢可之者必進息洛無可不果相遇於一世豈可度之尋常以此至終故當極盡志氣之所託也君此意弘足然決在必行當面止似爲一帖

(七三)未復知問晴快卿轉勝向平復也猶耿耿想上下無恙力知問不具王羲之敬問

酸感
(七四)日月如馳一蜺弁背再周去月穆松大祥奉瞻廓然永惟悲摧情如切割汝亦增慕省疏

(七五)延期官奴少女病疾不救痛感貫心吾以西夕情愿所鍾唯在此等豈圖十日之中二孫

天命惋惜之甚未能喻心可復如何

此有二帖語異

敬親今在刻其後復亡甚不可言

(七六) 穰鐵不知已得一行短書

(七七) 行近遣書想卽至此爾汝佳不得懸心吾之劣力數字

(七八) 七月十三日告鄱陽兄弟大降制終去悔悼甚永絕悲傷痛懷切割心情也

(七九) 諸葛忝者君識之不才幹好佳往爲錢塘著績又入僕府有以盡悉宰民之至也甚欲自託於明德云臨安春當闕爾者君能請不僕必欲言得佳長史亦當是君所須既得里人其事異常故乃爾須還告之

(八〇) 人理不可得都絕每至屬致使人多歎

(八一) 十五日羲之報近甚倉卒得十三日音知卿佳慰之力及陽主書不一一羲之報

(八二) 會稽亦復與選論卿否吾誠勅勅於論事然於弟尙不惜小宜謂選官前意已佳可不復

煩重卿更思必謂宜論者必有違矣

(八三) 上下安也和諸過見之欣然敬豫乃成委頓令人深憂江生亦連病今已差

(八四) 知阮生轉佳甚慰甚慰會稽近患下始差諸謝粗佳

(八五) 足下差否甚耿耿喉中不復燥耳故知問具示王羲之白

(八六) 冷過足下夜得眠不祇差也復何治甚耿耿長史復何似故問具示王羲之白

(八七) 遂無雨候使人歎得諸孫書高田皆欲了

(八八) 得書知足下患癖念卿無賴思見足下冀脫果力不一王羲之白

(八九) 此賢懷所禮也面一一

(九十) 五月十四日羲之近反至也得七日書知足下故爾耿耿善將息吾腫得此霖雨轉劇憂

深力不一羲之

(九一) 適萬石去月五日書爲慰尋得彭祖送萬九日露版再破賊有所獲想足摧寇越逸之勢

宜適許司農書爲慰無人未能得重故向餘杭間此注三行短

(九二) 因緣示致問非書能悉想君行有旨信

(九三) 伯熊上下安和爲慰可令知問叔夷子前恨不見可令能知消息

(九四) 羊參軍還朝論長見敦恕其爲慶慰無物以喻今又告誠先靈以文示足下感懷勵心

(九五) 又以表書示卿政當亦不一

(九六)痛念玄度立如志而更速禍可惋可痛者君書亦增酸服食故不可乃將冷藥僕即復是中之者腸胃中一冷不可如何是以要春秋輒大起多腹中不調適君宜深以爲意省君書亦比得之物養之妙豈復容言直無其人耳許君見驗何煩多云矣

(九七)袁彭祖何日過江想安穩耳失此諸賢至不可言足下分離如何可言

(九八)此段不見足下乃甚久遲面明行集冀得見卿得申近不問

(九九)謝侯此二字一行

(一〇〇)四月五月羲之報建安靈柩至慈陰幽絕垂卅年永惟崩慕痛徹五內永酷奈何無由

言告臨紙摧哽羲之報此一帖真草書

(一〇一)十一月十八日羲之頓首頓首從弟子天沒孫女不育哀痛兼傷不自勝奈何奈何王

羲之頓首此一帖行書

(一〇二)二蔡過葬來居此親親集事而君復出爲因耳此一帖草書

(一〇三)九月十八日羲之頓首茂善晚生兒不育痛之側心奈何奈何轉寒足下不可不可不

得間多日懸情吾故劣力不具王羲之頓首此一帖行草

(一一四)一日不暫展至恨叱而不已便懷不果東至可恨思叙想閒暇必顯也適都使還諸書具一一須面具懷

(一一五)得征西近書委悉爲慰不得西安許有問不知何久長風書平安今知殷候不久留之甚善甚善

(一一六)舍內佳不中書何似家中疾篤恆救旦夕比知覺有省書想至

(一一七)義興何似懸情慕容遂來據鄴可深憂官復道軍可以示義興中書

(一一八)昨得殷候答書今寫示君承無怒意旣而意謂速思順從或有怨理大小宜盤桓或至嫌也想復深思

(一一九)復征許也此四字一行

(一二〇)八月二十四日義之頓首闕竟增哀感奈何奈何兩足下可耳不得問闕日懸心吾故劣劣王義之頓首

(一二一)此雨足何耳故當收佳云彼甚快大事吳義興吳闕是蕩然可嘆

(一二二)知諸患耿耿今差也華母子佳

(一二三)時行皆遍事輕耳彼云何

(一二四)道祖瀝下乃危篤憂怛憂怛

(一二五)賊勢可見此云方軌萬萬如志但守之尙足令智者勞心此回書恆懷湯火處世不易

豈惟公道此兩字行書下側書

(一二六)諸人十二日書云慕容乃抄梁下得數闕目下疾疫非常乃以至京極有傷此覆之下者想君勤勤之

(一二七)復委篤恐無興理諸人書亦云爾也憂之怛怛得停乃公私大計也

(一二八)君頃以何永日憶去冬不可得知如何如何

(一二九)桓公以江州還臺選每事勝也不可當在誰耳

(一三〇)源書以發吾欲路次見之亦不欲停甚闕

(一三一)官舍佳也得諸舍問不知遮何日西言及辛酸卿不可懷期等故勿憂勿憂深

(一三二)近書及至也瞻望不遠而未期整面如之何遲得問也

(一三三)謝侯數不在嘆此一行至處皆賦

(一三四)前知足下欲居此常喜遲知定不果悵悵未知見卿期當數音問也

(一三五)得都近問清和爲慰云劉生近欲舉君爲山陰以中當爲最君期於未獲供養處相爲慨然仕宦殆是想也

(一三六)君學書有意今相與艸書一卷

(一三七)小大佳不可得司馬問懸情適安以中軍出鎮有避賢意乃云行得言面不知公私此理卒當之耶甚憂真本無集之者想今與君書一

(一三八)見此當何言但恐今婦必門首有出四字復有將來之弊耳此願盡珍御理

(一三九)想彼人生平安二鄰數闕也敬豫諸人近來停數日悉佳安石已南遷其諸兄弟此改殊命蕭索聞君以復入相府何時當應命未得亦當然罔思得爲鄰豈常情恐君方處務此命難期爲之何不一佳復意問也

(一四〇)源遂差不云尙未恭命終之何聞真長知吳興想必如意南道差不

(一四一)君太小佳不松廬善斷也僕信還秦州將去月十二日告甚慰如曹失護語此君甚康壯常是肥渴耳實尋還遲之不可言二妹差佳慰問心期中冷頃時行可畏愁人

(一四二)不得司馬近問懸情近所送書卽至也君信明早令得後得鄙書未至卽想東不久干

(一四三)此鄙問無恙諸從皆佳此諸數耳知劉阮數闕

(一四四)溫公在此前北面還此復初闕散爲慰便乞良不可言卿得知之復共一快樂

(一四五)武妹小大佳也闕字

(一四六)知郡荒吾前東周旋五千里所在皆爾可歎江東自有大頓勢不知何方以救其弊民

事自欲歎復爲意卿示聊及闕字

(一四七)數得桓公問疾轉佳也每懸胡云征事未有日佳也以逼勢不知卒云何爾

(一四八)君大小佳不至此乃知熙往覺少不得同萬恨萬恨云出使當西念遠別何可言遲見

玄度今或以在道

(一四九)賓如人往不堪致心憶之不忘懷之

(一五〇)妹不快憂勞餘平安

(一五一)未得安西問玄度忽腫至可憂慮得其昨書云小差然疾候自恐難耶

(一五二)與安石俱佳還七日增想投命積日不復知問弟寧善然復憂之不去懷吾途沉滯

兼下如近數日分無復理昨來增服陟釐丸得下不知遂斷不了無所噉而藥得停不知當復見弟
注理不獨下便長歎小蘇息更知問二爲庶諸人何以謝之已上九字注兩行

(一五三)想清和士人皆佳彭祖諸人得是下慰旦夕也此諸賢平安每面想有歎慨追恨近日
不得本善散無已已度足下還期不久耳此者數令知問

(一五四)懷足下可謂禮之闕今以志心寄卿想必至到論之救命不暇此事於今爲奢遠耳要
是事其本心

(一五六)所欲論事今付

(一五七)今與馮公論何產足下可思助明清淡至是舉今又語真道今宜旨矣

(一五八)臣義之言寒嚴不審聖體御膳何如謹付承勳靜臣義之言召表皇太后一

(一五九)臣義之言伏惟陛下天縱聖哲往齊二儀自哲以下則注

(一六〇)應期承運踐登大祚普天率土莫不同慶臣抱疾遐外不獲隨例瞻望震極屏營一隅

臣義之言

(一六一)劉氏平安也梅妹可得袁妹腰痛冀當小爾耳汝母故若以不安食疾久憂憤當思平

理也神意不同前者也

(一六二)今付北方脯二夾吳興鮓二器蒜僅條四千二百

(一六三)司馬雖篤疾久頃轉平除無他感動奄忽長逝痛毒之甚驚惋懼動痛切五內嘗奈何奈何省書感哽

(一六四)雨寒卿各佳一字注不諸患無賴力書不一一羲之問

(一六五)想官舍無恙吾必果二十日後乃往遲喜散恙比爾自相聞也

(一六六)九月三日羲之報敬倫遮諸人去晦祥禪情以酸割念卿傷切諸人豈可堪處奈何奈何及書不既羲之批

(一六七)九月二十五日羲之頓首便陟冬日時速感歎兼哀傷切不能自勝奈何得七月末時書爲慰欲寒足下常疾此何似每耿耿吾故不平復憂瘁力困不一王羲之頓首

(一六八)且極寒得示承夫人復小劬不善得眠助反側想小爾復進何藥念足下猶悚息卿可否吾昨暮復大吐小噉物便爾且來可耳知足下念王羲之頓首

(一六九)延期官奴小女竝得暴疾遂至不救啓痛心奈何吾心西夕至情所奇唯在此等以禁

恩餘年何意旬日之中二孫天命日夕左右事在心目痛之纏心無復一至於此可復如何臨紙咽塞

(一七〇)六月二十七日羲之報周嫂棄背再周忌日大服終此晦感摧傷悼兼情切劇不能自勝奈何奈何穆松垂詳除不可居處言以酸切及領軍信書不次羲之報

(一七一)頓首頓首亡嫂居長情所鍾奉始獲奉集冀遂至誠展其情願何圖至此未盈數旬奄見背棄情至乖喪莫此之甚追尋酷恨悲惋深至痛切心肝當奈何奈何兄子荼毒備嬰不可忍見發首痛心奈何奈何王羲之頓首

(一七二)君頃復以何散懷鐵云秋當解褐行復分張想君比爾快爲樂彥仁書云仁祖家欲至蕪湖單弱伶俜何所成君書得載停郡迎喪甚事宜但異域之乖素已不可言何時可得發

(一七三)六日告姜復內始晴快情汝一字注母子平安

(一七四)二十七日告姜汝母子佳不力不一耶告

(一七五)前使還有書哀猥不能敘懷情痛兼哀若割當奈何奈何省弟累紙哀毒之極但報書難爲心懷况卿處之何可具忍有始有卒自古而然雖當時不能無情痛理有大斷豈可以之致弊何由寫心絕筆猥咽不知何言也

(一七六)十二月六日羲之報一昨因暨主簿不悉昨得去月十五日二十三日二書爲慰兩書夜無解夜來復雪弟各可也此日中冷患之始小佳力及不一一羲之報

(一七七)羲之死罪前得雲子諸人書竝毀頓胡子惟分推難爲心當有分西者否羲之死罪

(一七八)七月五日羲之頓首昨便斷艸葬送期近痛傷情深奈何奈何得去月二十八日告具問慰懷力還不次王羲之頓首

(一七九)七月十六日羲之報凶禍累仍周嫂棄背大賢不救哀痛兼傷切割心情奈何奈何遣書感塞羲之報

(一八〇)二十三日發至長安云謂南患無他然云符健衆尙七萬苟及最近雖衆由匹夫耳卽今尅此一段不知歲終云何守之想勝才弘之自當有方耳

(一八一)隔以久諸懷旣不可言且今多慘戚遲君果前暨得一散懷知以多疾不果乃當秋事省告同此歎恨如何可言葬事不可倉卒當在九月初過此故欲一與吳興集冀無不尅耳然事來萬端不知如人意不非書能悉君數告以慰之耳

(一八二)六月十六日羲之頓首秋節垂至痛悼傷惻兼情切割奈何奈何此雨過得十日告知

君如常吳興轉勝甚慰想得此涼日佳惠散乃委煩耿耿且以佳興消息僕故是常身劣解日力不次王羲之頓首

(一八三)歌章輒付卿或有寄書人者可寄一道與吾也

(一八四)羲之死罪去冬在東鄆因還使白牋伏想至自頃公私無信使故不復承動靜至於詠德之深無日有隧省告可謂眷願之至尋翫三四但有悲慨民事以西夕而衰疾日甚自恐無整展語平生理也以此忘情將無其人何以復言惟願珍重爲國爲家時垂告慰絕筆情塞羲之死罪

(一八五)六月十一日羲之報道護不救疾惻怛傷懷念弟聞問悲傷不可勝奈何奈何曹妹累喪兒女不可爲心如何得二十三日書爲慰及還不次王羲之報

(一八六)追尋傷悼但有痛心當奈何奈何得吾慰之吾昨頻哀感便欲不自勝舉旦服散行之益頓乏推理皆足如下所誨然吾老矣餘願未盡唯在子輩耳一旦哭之垂盡之年轉無復理此當何益冀小却漸消散耳省卿但有酸寒足下念故言散所豁多也王羲之頓首

(一八七)向遣書想夜至得書知足下問當遠行諸懷何可言一十必早發想足下如何期也阮候止於界上耳向書已具不復一一王羲之白宿息想足下安書吾猶不勝能佳一十早往遲王羲之

頓首宿字下另
爲一帖

(二八八)二十九日羲之報月終哀摧傷切奈何得昨示知弟下不斷昨紫石散未佳卿先
羸甚好消息吾此日極不快不得眠食殊頓勿令合陽冀當佳力不一王羲之報

(二八九)九月二十八日羲之頓首頓首昨者書想至參軍近有慰阮光祿信在干許中郎家欲
因書此去報知庾君遂不救疾摧切心情不得自塗兩
三字甚痛當奈何深當寬勉以不忘先心臨紙但有

酸惻王羲之頓首

(一九〇)羲之白不復面有勞得示足下佳爲慰吾却却遽又睡甚勿勿力不具王羲之白

(一九一)十一月五日羲之報適爲不吾悉不適弟各佳不吾至勿勿力數闕羲之報

(一九二)兄弟上下遠至此慰不可言嫂不和憂懷深期等殊勿勿焦心

(一九三)桓公不得敘情不可居處雲子諸人何似耿耿能數省否彥仁數問也修載覽來忻慰

(一九四)六月十九日羲之白使還得八日書知不佳爾何耿耿僕日弊而得此熱勿勿解白耳

力遣不具王羲之白

(一九五)十二月一日羲之白昨得還書知極不加疾人甚憂耿耿消息比佳耳吾至乏劣爲爾

日日力不一一羲之報

(一九六)想明日可謝諸子

(一九七)十四日羲之白近反不悉闕兩足下佳不得近問問無殊不佳頓劣因不一一羲之白

(一九八)羲之頓首何脫知意至諸君皆困乏常想無之何緣作此煩損今付還王羲之

(一九九)長高當暫還耶

(二〇〇)范公書如此今示君須庚見故當勸果之告旨語君遲而不可言

(二〇一)一日多恨知足下散動耿耿護護吾至不佳劣劣不一一王羲之頓首

(二〇二)司馬疾篤不果西憂之深公私無所成

(二〇三)知比得丹陽書甚慰乖離之歎當復可言尋答其書足下反事復行便爲索然良不可言此亦分耳遲面一一

(二〇四)比日尋省卿文集雖不能悉周徧尋覓以爲佳者名固不虛序述高士所傳小有異同見卿一一問應止揚王孫前以其及意同可誠述敘之耶暇日無爲想不忘之

(二〇五)初月一日羲之白忽然改年新故之際致歎至深君亦同懷近過得告故云腹痛懸情
災雨比復何似氣力能勝不僕爲耳力不一王羲之

(二〇六)且書至也得示爲慰云小大多患念勢心遲見足下未果爲結力不一王羲之白

(二〇七)三日先疏未得去得四日疏爲慰兄書已具不復一一

(二〇八)鎮軍昨至尙未見也尋見之悲欣不可言

(二〇九)上下近問慰馳情不知何似絕不得松問汝得旨問馳白宜豫知分春事也吾日東可

語期令知消息

(二一〇)復數橘子卽云乃好可噉久得新栗此院冬桃不能得多送觸事何當不存性恆語然

獨折

(二一一)知書有去縣尋去誠意義官至也有禮制恐不必果耶且君在彼縣常以爲得意宜思

之耶意至故示

(二一二)兄子發當未有定日當送至瀾遠乖不可復言

(二一三)適欲遣書會得足下示

(二二四)十九日羲之報近書反至也得八日書知吳故羸敬倫動氣發耿耿想得冷此爲佳也
敬文佳不一義之報

(二二五)省足下前後書未嘗不憂欲與事地相與有深情者何能不恨然古人云行其道忘其
爲身真卿今日之謂政自當豁其胸懷然得公平正直耳未能忘已便自不得行然此皆在足下懷願
卿爲復廣求於衆所悟故多山之高言次何能不

(二二六)十一月七日羲之報近因闕子卿書想行至三字霜寒弟可不頃日了不得食至爲慮
劣力及數字羲之報

(二二七)二十三日羲之報一日得書皆在計書所不得有反轉熟卿各佳否定何可得來遲面
不一義之報

(二二八)知須果裁便可遣取視君勢陳欲欲無出理

(二二九)近書至也得十八日書爲慰雨蒸比各一字可不參軍轉差也懸耿吾脚痛劇炙不得

力至患之不得書自力數字

(二二〇)尊夫人向來復何如爲何所患甚懸情念卿累息具至羲之欲問

(二二二)想諸舍人大皆佳弟擢之可爲心且得集目下此慰多矣姊累告安和梅妹大都可行表妹極得石散力然故不善佳疾久尙憂之想野久恙至善分張諸懷可云不知其期何時可果永嘉競逐者有力恐難冀得大柿當種之

(二二三)篤不喜見客篤不堪煩事此自死不可化而人理所重如此都郡江東所聚自非復弱幹所堪足下未知之耳給領與卿同殊爲過差交人士因開門以勉待之無所復言

(二二四)君遠在此乃受恩來今留之明晚其親親集想君未便至餘姚爾

(二二五)云殷生得快問大事數謝生書但有藥耳云彥仁或宣城甚佳情事實宜今有云想深復征許也

(二二六)寂不得都問知卿之曰問故未知西審問使人憂耿得問示

(二二七)信使甚數而無還者似書疏不可得得問宜示告之知長翔田舍比卿還當知何候須

得音副民望甚善

(二二八)義之白霧氣足下各何如長素轉佳甚耿耿

(二二九)冀行面遣知問王羲之白

(二二九)昨道諸書今示卿相見之恐殷侯必行義望雖宜爾然今此集信爲未易卿者便西者良不可言也晴快足下各佳不長素轉佳也甚耿耿故知問具示王羲之白

(二三〇)足下晚可耳至劣劣力不一王羲之白

(二三一)十二月二十四日羲之報歲盡或歎得十二日書爲慰大寒比可不吾故羸乏力不一

一王羲之報藥湯諸人佳也今知問朱博士何當還君可致意令速還想無稽留

(二三二)吾至今目欲不復見字

(二三三)見君小大佳不過此乃知熙佳覺少不同萬恨萬恨云出便當西念遠別何可云遲見

玄度今或以在道

(二三四)賓諸人佳不皆致心憶之不忘懷

(二三五)妹不快憂勞餘平安

(二三六)初月十二日羲之累書至得去月二十六日書爲慰比可不僕下連連不斷無所一欲

噉輒不化消諸弊甚不知何以救之罔極然及不一羲之白

(二三七)昨近有書至此故不多也遲書不悉耳

(二三八)知尙書中郎差爲慰不得吳興問懸心數吳中聞耳小奴在此忽患瘧此數發今日最爲大都輕瘧耳尙小停今在吾廐中念猶懸心小患耳無所垂心須佳乃去

(二三九)此言不可乏得知足下問吾忽忽力數字

(二四〇)直遣軍使者可各差十五人耶合三十人足用事

(二四一)足下知消息今故遣問使至具示之力書不一王羲之白

(二四二)方回遂舉爲侍中都下書云殷生議論殊異處憂之道故思同歲寒盡此書還

(二四三)論亦不能佳體懷省無所乏然卿供給人士及使役吏人論者亦謂大任意在世中政自不得不小俯仰同異卿復爲意卿此懷亦當玄同不能勉人耳

(二四四)見尙書一日遣信以具必宜有行者情事恐不可委行使耶遲還具問亦以與尙書諮懷今復遣諮吳興也

(二四五)官舍佳也節氣不適可憂彼云何昨得羲書比佳甚慰甚慰得官奴晉寧書賓平安念懸心此粗佳一日書此一一

(二四六)民以頃情事不可不勤思自補節勤以食噉爲意乃勝前者而氣力所堪不如自喪初

不哭不能不有時惻愴然便非所堪哀事損人故最深益知不可不豁之

(二四七)知足下數祖伯諸人問助感絕不得兄子問懸念可言此於南北旨使無理欲歎久也

亦同夫人竝欲勿勿羣從書皆佳道冲書平安汝當改葬不可云勞冲遇此事或復連留

(二四八)省告一一足下此舉由來吾所具卿所云皆是情言然權事慮之重則當廢情以從宜

非書所悉見卿一二

(二四九)吾陟冬節便覺風動日日增甚至去月十日便至委篤事事如去春但爲輕微耳尋得

小差固爾不能轉勝沈滯進退體氣肌肉便大損憂懷甚深今尙得坐足神意爲復可耳直疾不除晝

夜無復聊賴不知當塗一字得暫有間還得闕其寫不如今忽忽日前耳手亦惡欲不得書示令足下知

問

(二五〇)七月十五日羲之白秋日感懷深得五日告甚慰晚熱盛君比可不遲復後問僕平

力及不一王羲之白

(二五一)知君患隱何以及爾是爲疲之極也一知此事恐不可以不絕骨肉之愛無論人事也

乃甚憂君若自量過歎患不以輕心者一事不爾當何理

(二五二)鄙故勿勿願日三對小行四升至可憂慮如桓公書旨闕其不去恐不能平

(二五三)此信過不得照書想其書一一也小大佳不賓轉勝皆謝之賢妹大都勝前至不欲食
篇羸恆令人憂餘粗佳

(二五四)阿刁近來到下上下皆佳姜夫數白

(二五五)得書知足下且欲願何以不進耶向與謝生書說欲往知登停山停山非所辯故可共
集謝生處登山可他日耶王羲之白

(二五六)不得君家書疏多往來平安耳今年此夏節氣至惡當令人危幼小疾苦故爾憂勞不
可言

(二五七)七月二十一日羲之白昨十七日告爲慰極有秋氣君比可耳力及不一一王羲之頓
首

(二五八)近復因還信書至也

(二五九)得九日問亦云鄙平平想得涼轉勝以疾乃服法必解此意

(二六〇)來月必欲就到家而得其問云尙多溪毒當復小却耳僕故有至臨州意尙未定自更

有果南行者還乃得至壽春耳

(二六一)得都下九日問無他

(二六二)得豫章書爲慰想以具問昨得都十七日書賊徑還蠡臺不攻譙是其反善之誠也想殷生得過此者猶令人憂期諸處分猶未定羊參軍旦夕至也遲一一

(二六三)殷廢責事便行也令人歎恨無已

(二六四)安石定目絕令人帳然一爾恐未卒有散理期諸處分猶未定憂縣益深念君馳情又遣從事發遣君無復坐理交疾患何以堪此何以堪此恐屬無所復厝懷卽乖大小不可言且憂君以疾他曳不易

(二六五)得司州書轉佳此慶慰可言云與君數數或探樂山崖可願樂遙想而已云必欲剋餘杭之遲期此不可言要須君旨問僕事中久宜暫東復令白便行還使行當至剡槎上二十日後還以宗政當與君前期會耳遲此情兼二三

(二六六)昨暮得無奕阿萬此月二日書甚近清和耳羌賊故在許下自當了也桓公未有行日

阿萬定闕吳興

(二六七)未復弘道近書見與弘遠書恐卿不得久坐何如休稚玄佳不想數得足下旨令知問
(二六八)矇風膠今年似晚來年其主不起首者想或可得借乎

(二六九)得反又獲示知足下發動脅腫卿此疾苦甚似期一一想消一當轉佳爲何治也吾爲
亦劣大部復是平平隔耳許日前後有其効何喻冀涼日晚散耳尋復知問王羲之

(二七〇)羲之頓首賢女殯歛永畢情以以傷惋不能已已兄足下愍悼深至何可爲心奈何奈
何不能無時之痛愛卿便深今何如惠深達既往吾志勿勿力知問臨書惻惻王羲之頓首

(二七一)賢室何如何可爲心唯絕難於人理耳諸患猶爾憂勞深似關到江侯行底足下遺檄次
冷取書

(二七二)得謝范六日書爲慰桓公威勳當求之古令人歎息此當集桃襄也

(二七三)斷酒事終不見許然守之尙堅弟亦當思同此懷此郡斷酒一年所省百餘萬斛米乃
過於租此救民命當可勝言近復重論相賞有理卿可復論

(二七四)知數致苦言於相時弊亦何可不耳頗得應對不吾書未被答得桓護軍書云口米增
違皆當停爲善

(二七五)問董祥吾亦問之冀必來兵時得之甚佳頃日憤憤不暇復此省示及乃復憶之耳

(二七六)周公東征四國是違誠心款著謂之累積頻頻書想至陰寒想自勝常皇矣漢祖纂堯

此四字
真後闕

(二七七)羲之死罪苟葛各一國佐命宗臣觀其轍迹奇士也然苟獲譏於憂卒意長恨恨謂其弘濟之心宜被大道諸葛經國達治無間然處事而無玷累獲全名於數代至於建鼎足之勢未能忘已所謂命世大才以天下爲心者容得爾乎前試論意久欲呈多疾憤憤遂忘致今送願因暇日可垂試省大期賢達與廢之道不審謂粗得阡陌不

(二七八)信所懷願告其中并爾郎子意同異復云何逸然無諮敍之期每賜翰墨使如整展羲

之死罪

此一帖真行

(二七九)足下行穰久人還竟應快不大都當任縣量宜其令

國二字

因便任耳立俟王羲之白

(二八〇)足下各可不都五日書今送謝卽至想源得免豺狼耳王羲之

(二八一)羲之死罪近因參筆白牒伏想必達此春以過時速與深兼哀傷權切割心情奈何奈

何須臾寒食節不審尊體何如不承問以經月馳企民疾根治滯了無差候轉久憂深叔闕遣信自力

粗白不宣備義之死罪

(二八二) 憤墓在臨川行欲改就吳中終是所歸中軍往以還田一頃烏澤田二頃吳與想弟可還以與吾故示想弟居意故如往言忠終高也是以思同之

(二八三) 此三頃田樂吳舊耳云卿軍府甚多田也以上八字注宜須一用心吏可差次忠良

(二八四) 十九日義之頓首明二旬憎感切奈何奈何得十二日書知佳爲慰僕左邊大劇且食少至虛乏力不一一王義之頓首

(二八五) 十二日告李氏甥得六日書爲吾劣劣力不一一義之書行書

(二八六) 義之死罪復蒙殊遇求之本心公私愧歎無言以喻去月十一日發都遠遠朝廷親舊乖離情懸兼至良不可言且轉遠非徒無諮觀之由音問轉復難通情慨深矣故旨遣承問還願具告義之死罪

(二八七) 羣從彫落將盡餘年幾何而禍痛至此舉目摧喪不能自喻且和方左右時務公私所賴一旦長逝相爲痛惜豈惟骨肉之情言及摧惋永往奈何袁妹委篤示致問荒憤不得此熱不能不取給腹中便復惡無賴

(二八八)羲之死罪累白想至兩快想必安和遲復承問下官劣劣日前可力白不具王羲之死罪

(二八九)皆以具示復自耳羊參軍尋至具一子期諸人何似耿耿心制行終不可居處

(二九〇)餘皆平安也

此五字一行闕

(二九一)及以令弟食後來想必如期果之小晚恐不展也故復旨示羲之報

(二九二)增運白米來者云必行此無所復云吾於時地甚疏卑致言城不易然太老子以在大臣之末要爲居時任豈可坐視危難今便極言於相并於殷謝書皆封示卿勿廣宣之諸人皆謂盡當今事宜直恐不能行耳足下亦不可思致若言耶人之至誠故當有所面不爾坐視死亡耳當何

當何已下

(二九三)吾復五六日至東縣還復至問

(二九四)想官舍佳見護軍近書甚慰仁祖轉嘉然疾根不除尚令人憂復得問未復反書甚慰

入月共至窟山看甘橘思君宜深想鐵已還旦夕展也故復指示羲之報

(二九五)小犬佳也不得尙書中書問耿耿得業書慰之

(二九六)亦得業書爲慰今付還安方決去不言言卽卿書致

(二九七)適阮兒其氣散暴處便危篤憂之怛怛

(二九八)貴奴差不想不成大病傷寒可畏令人憂當盡消息地

(二九九)蚶二斛厲二斛前示噉蚶得味今旨送此想噉之故以爲佳比來食日幾許得味不具

示

(三〇〇)所欲示之行

(三〇一)若治風教可弘今忠著於上義行於下雖古之逸士亦將眷然况下此者觀頃舉厝君子之道盡矣今得護軍還君屈以申時玄頃命朝有君子曉然復謂有容足地常如前者雖患九天不可階九地無所逃何論於世路萬石僕無不敏不能期之以道義豈苟且豈苟且若復以此進退直是利動之徒耳所不忍爲所不以爲

(三〇二)上方寬博多通資生有十倍之覺是所委息乃有南眷情是謂何以密示一勿宣此意爲與卿共思之省以付火

(三〇三)諸暨始寧屬事自可得如教丹陽意簡而理通屬所無復逮錄之煩爲佳想君不復須

言謝丹陽亦云此語君諸暨始寧

(三〇四)古之辭世之或被髮佯狂或汚身穢迹可謂艱矣今僕坐而獲免遂其宿心其爲幸慶

豈非天賜違天不祥四字注頃東遊還修治桑果今盛敷榮率諸子抱孫遊觀其間有一味之甘割而分

之以娛目前雖植德無殊逸猶欲教養子孫以敦厚退讓戒以輕薄庶令舉策數馬彷彿萬石之風君

謂此何如遇重熙去當與安石東遊山海并行田盡地利頤養間暇衣食之餘欲與親知時共歡讌雖

不能興言高詠銜杯引滿語田里所行故以爲撫掌之資其爲得意不勝言耶常依陸賈班嗣楊王孫

之處世甚欲希風數子老夫志願盡於此也君察此當有二言不真所謂賢者志於大不肖志其小無

緣見君故悉心而言五字注以當一面

(三〇五)想大小皆佳知賓猶伏爾耿耿想得夏節佳也念君勞心賢妹大都轉差然以故有時

嘔食不已是老年衰疾更亦非可倉卒大都轉差爲慰以犬近不復服散當將陟釐也此藥爲益如君

告

(三〇六)大都夏冬自可春秋輒有患此亦人之常期等平安姜羸少差先生至其歡慰且卿

女一而已

(三〇七)大婚定芳勢道也

(三〇八)先生頃可耳今日略至遲委垂知樂公可爲之慰桃膠易得可以少耶專一物不移乃不忠也充迎不致意知陽意事迎願人之善

(三〇九)行政五十日不復得問懸情皆佳也 闕何貽云得潁陽書平安慰意不得吳諸人間懸遲之

(三一〇)古之御世者乃志小天下今封城區區一方任耳而恆憂不治爲時恥之但今卿重熙之徒必得申其道更自行有餘力相弘也

(三一)甲夜羲之頓首向遂大醉乃不憶與足下別時至家乃解尋憶乖離其爲歎恨言何能喻聚散人理之常亦復何云唯願起下保愛爲上以俟後期故旨遣此信期取足下過江問臨紙情寒王羲之頓首

(三二)足下識先日之言信具此一帖似闕

(三三)前得君書卽有反想至也謂君前書是戲言耳亦或謂君當是舉不失親在安石耳省君今示頗知如何老僕之懷謂君體之方復致斯言愧誠心之不著若僕世懷不盡前者自當端坐觀

時直方其道或將爲世大明耶政有救其弊算之熟悉不因放恕之會得期於奉身而退良有已良有已此其得之心不待多言又餘年幾何而逝者相尋此最所懷之重者頃勞服食之資如有萬一方欲思盡頤養過此以往未知敢聞言止於今也

(三一五)知諸賢往數見范生亦得其近書爲慰又得孔生書亦云不能數何爾耶江生可耳斷絕冀涼集也得司州十六日書諸疾患至憂之至深矣有斷未想桓公數使亦知謝生大得情和至慰安以當至吳興遲見之也

(三一六)知須米告求常如雲此便大乏勅以米五十斛與卿有無當共何以論借

(三一七)今有教勅付未可送之

(三一八)數上下問如常何可得集耶念馳情未異果爲結念致問

(三一九)不得東陽問想卿婦遂平復耳聾佳不謝之幼小頃可行華母子平安知足下故望暨還歲內何理過歲必有理不思存足下復得一敘平生當可言得卿書尋省反復但有悲慨此者且當

數致年知闕一字

(三二〇)畢力果思遲言面不可復得此與范期後月五日遂乃剋耳還遣旨進

(三二一) 頃猶小差欲極遊目之娛而吏卒守之可歎耳陽化果似小可何日得卿諸人

(三二二) 鄙疾進退憂之甚深使自表求解職時以許乃當是公私大計然此舉不深又不宜是

之於始二三無所成可以示從女其劣欲知消息

(三二三) 足下所欲餘姚地輒勅驗所食輒告

(三二四) 此雨過將爲受想彼不必同苗稼好也

(三二五) 比見敬祖大小可耳念孫阮諸人皆何似耿耿

(三二六) 尙書中郎諸人皆佳比面雖近隔殊思卿度還旦夕

(三二七) 吾頃胸中惡不欲食積日勿勿五六日來小差尙甚虛劣且風大動舉體急痛何耶賴

力及足下家信不能悉王羲之

(三二八) 永和九年歲在癸丑暮春之初會於會稽山陰之蘭亭修禊事也羣賢畢至少長咸集

此地有崇山峻嶺茂林修竹又清流急湍映帶左右引以爲流觴曲水坐列其次雖無絲竹管絃之盛

一觴一詠亦足以暢敘幽情是日也天朗氣清惠風和暢仰觀宇宙之大俯察品類之盛所以遊目騁

懷足以極視聽之娛信可樂也夫人之相與俯仰一世或取諸懷抱晤言一室之內或因寄所託放浪

形體之外雖趨舍萬殊靜躁不同當其欣於所遇暫得於己快然自足不知老之將至及其所之既倦情隨事遷感慨係之矣向之所欣俛仰之間以爲陳蹟猶不能不以之興懷况脩短隨化終期於盡古人云死生亦大矣豈不痛哉每覽昔人興感之由若合一契未嘗不臨文嗟悼不能喻之於懷固知一死生爲虛誕齊彭殤爲妄作後之視今亦由今之視昔悲夫故列敘時人錄其所述雖世殊事異所以興懷其致一也後之覽者亦將有感於斯文

(三二九)纏利害未若任所遇逍遙良辰其一三春啓羣品五字寄暢在所因眺望天際俯瞰綠水

濱寥朗無涯觀寓目理自陳大矣造化功萬殊莫之均羣籟雖參差適我無非新其二猗歟二三子莫非

齊所託造真探玄退涉世若過客前世非所期虛寶是我宅自前字至宅字注遠想千載外何必謝曩昔相與無

所與形骸自脫落其三鑑明去塵垢止則鄙鄒生體之周末易三觴解天形方寸無停主務伐將自平雖

無絲與竹玄泉有清聲雖無嘯與歌詠言有餘馨取樂在一朝寄之齊千齡其四合散固有常修短定無

始造新不暫停一往不再起於今爲神奇信宿同塵滓雖能無慷慨散之在推理言立同不折河清非

所俟其五

(三三〇)十一月四日右將軍會稽內史琅琊王羲之敢致書司空高平鄒公足下上祖舒散騎

常侍撫軍將軍會稽內史鎮軍儀同三司夫人右將軍劉闕女誕晏之允之允之建威將軍錢塘令會稽都尉義興太守南中郎將江州刺史衛將軍夫人散騎常侍荀文女誕希之仲之及尊叔廩平南將軍荊州刺史侍中驃騎將軍武陵康侯夫人雍州刺史濟陰郗說女誕頤之胡之耆之美之內兄胡之侍中丹陽尹西中郎將司州刺史妻常侍護國夏侯女誕茂之承之羲之妻太宰高平郗鑒女誕玄之凝之肅之徽之操之獻之肅之授中書郎驃騎諮議太子左率不就徽之黃門郎獻之字子敬少有清譽善隸書咄咄逼人仰與公宿舊通家光陰相接承公賢女淑質直亮確懿純美敢欲使子敬爲門閭之賓故具書祖宗職諱可否之言進退唯命羲之再拜

此是郗家論婚書書迹似夫人

(三三二) 良深路滯久矣况今季末無所多怪足荒何卹於此足下志嶠外有由來及然以觀勢之卿入貴於不令耳書政當爾王羲之白

(三三三) 知以智之所無奈何不復稍憂此誠理也然爾之懷何能已已乎未能得面書何所悉但深得近期暨還故因數初日月

(三三三) 吾湖孰縣須水田卿都可遺儼之墓不知處去年儼之者似是俞進可問之卿不出停此

(三三四)親往爲慰思後諸能數不想昨咄兄以日此粗佳二謝叔喪與公近使索然玄度來數日有疾患便復來阿萬小差大事間有重慮安佳行來遇大蕩然阮公政散耿懷祖可呼賀祭酒具

(三三五)足下欲同至上虞一宿還無所廢吾初至便與長史俱行無不可不

(三三六)吾爲卿任此聲者但此懷自不復闕之於時

(三三七)小大皆佳也度有近問不得上虞甚佳足下當能相就不思面卿前云當來何果也

遲散無喻吾後月當出以念示

(三三八)下近欲麻紙適成今付三百寫書竟訪得不得其人示之

(三三九)省書知定疑來汝君長臆所養雖小要爲喪至劉夫人虛坐在堂政爾遠來於禮誠不可違所以狼狽遠迎汝情地信難忍交恐有性念慮得來想慰釋實引是以下復思此耳若汝能割遣無益得過喪制遂來居此乃事宜也若自量不能違哀念須吳等旦夕相喻者當來汝當自若吳意盡此也

(三四〇)若來大小祥當復上者殊更良昌若汝不出農當單出汝能遣農速行不諸宜皆自詳計審日遲望而未定殊更悵恨不可言

(三四一)此乃爲汝求宅謂汝來居止理軍千何可久處而情事不得從意可歎可歎終果來居者故當爲汝求也以書示農

(三四二)初月二日羲之頓首忽然此年感遠兼傷情痛切心奈何奈何念君哀窮奄經新故仰慕崩絕豈可惜忍比各何似相憂不忘當深消息以全勉爲大僕衰老殆是日不如日力知問王羲之頓首

(三四三)思率府朝得書知問足下差但尙頓極之不一

(三四四)初月一日羲之報忽然改年或思兼傷不能自勝奈何奈何異更寒諸疾此復何似不得問多日懸心不可言吾猶不差甚尙劣力遣不知羲之報

(三四五)卿各何罪似先羸而處至痛愛涕深當得之思寬遣吾並乏劣自力不報息

(三四六)此上下可耳出外解小分張也須產往迎慶思之不可言知靜婢面猶爾甚懸心

(三四七)袁妹當來悲慰不言下家當慰意令知之

(三四八)期小女四歲暴疾不救哀敏痛心奈何奈何吾衰老情之所寄唯在此等失此女痛之纏心不能已已可復如何臨麻情酸

(三四九)知靜婢猶未佳懸心可小須留爾

(三五〇)十月十五日羲之頓首月半哀傷切心奈何奈何不可居忍得十三日書知問此何似
恆耿耿吾至勿勿小佳更致問王羲之頓首

(三五二)謝范新婦得闕富春還諸道路安穩甚慰心此日涼卽至耳安也上下集聚欣慶也華
等佳不自新婦母子去寂寔難言思子輩不可言

(三五三)羲之死罪伏想朝廷清和稚恭遂進鎮東西齊舉想剋定有期也羲之死罪死罪

(三五四)羲之白乖違積年每惟乖苦痛切心肝惟同此情當可居處羲之脚不踐地十五年無
由奉展比欲奉迎不審能垂降不豫唯哽闕故先承問羲之再拜

(三五五)再昔來熟如小有覺然晝改難堪知足下患之云故以闔棊是不爲患吾其爾無佳自
得此熱顛願終日未果如何王羲之頓首

(三五五)五月二十七日州民王羲之死罪死罪此夏復便半闕惟遠離衆情兼至時增傷悼頃
水雨未知有不審尊體如何得疾除也不承近聞馳企民自服椽屑下斷體氣便自差強此物益人斷
下去陟釐劫樊遠也以爲良方出何是真此之謂謹及因青州白牒不備羲之死罪死罪寒伏想安和

小大悉佳奉展乃具

(三五六) 羲之死罪見子卿具一字塗一荒民惠懷字一最要也甚以欣慰唯愿不倦爲善承留此生

嘗廣陵任佳此生處事以驗海陵江關間殊令人有懷也羲之死罪死罪

(三五七) 想元道弘廣平安道充當得還不

(三五八) 羲之頓首涼君可不安差不耿耿想比能果力不至羲之頓首頓首

(三五九) 阮信止於界上耳向書已具不復一一王羲之頓首

(三六〇) 昨得殷侯答書今寫示君承無怒詔連思順從或有怨望其不宜盤桓或順從至嫌也

想復深思

(三六一) 驗同罪行

(三六二) 十二月十日羲之白近復追付期想先後三字皆至昨得二十七日告知君故之腹痛

甚懸情災雨比日復何似善消息遲後問復一一王羲之白

(三六三) 知尋遣家信遲具問

(三六四) 向遣書想夜至得書知足下問當遠行諸懷何可言十一必早發想至足下如向期也

(三六五)行當是防民流逸不以爲利耶此於郡爲由上守郡更尋詳若不由上命而斷中求絕者此爲以利卿絕之是也縱民所之恐有如向者流散之患可無善詳具聞

(三六六)君欲船輒勅給所須告之

(三六七)得君戲詠承念至此年乃未見

(三六八)太保思一散知足下歸乃至孔建安家熱乃爾往還以十實非之所堪若之不復兩字注

更剋近道唯命是往矣

(三六九)恐有薄書之煩益屬所事可立制縣不給下貧二字注而給饒有之家開令治國別許爲

盛田不平者嚴制如此事省而虛實可知其或非或樂而絕付給者今爲不賦得里人遂安黃籍年皆

斯人非復一條可嘆今使獨坐令白郗侯求官邈等想必可得君亦當得見書若萬一不樂想必共思

得州二字注數十家見經營不爾無坐此理也別當以具慰深共思不待煩言

(三七〇)十二月二十二日羲之白節近感嘆情深得去月二十三日書知君故苦日耿耿善護

之往不僕得大寒疾不堪甚力還不具王羲之白

(三七一)十四日疏昨信未即取遣適得孔彭祖書得其弟都下七日書說雲子暴霍亂亡人理

乃當可耳。惋惋桓公周生之痛，豈可爲心。

(三七二) 農敬親，同日至，至數日耳。道路平安，爲慰妹，且停爲大慶。懋充

(三七三) 知弟不果行，吾不佳，面近也。玠

(三七四) 適書至也，知足下，明還行，復剋面王羲之白。

(三七五) 小大佳也，賢兄如猶當小佳，然下不斷，尙憂之。楨

(三七六) 近所示欲依上虞，別上申一期，尋案臺報不聽，上當戮力於事，不可但役解散。君縣乃

是今勝縣而復以爲難耶。

(三七七) 知足下，以界內有此事，便欲去縣，豈有此理。此縣弊久，因足下始有次第耳，必無此理。

便當息意，今勅諸處事及縣者，省馳書於臺中，論必釋然，故遣旨信示意。

(三七八) 羲之頓首，白雨無已，不兒猶小，差力不一。王羲之頓首。

(三七九) 省告攝功曹事，一一屬以所求，寬連廢守，命必欲肅之，是以問意，其志既立，不得不必。

行普通三年三月徐僧繇一十五紙天寶十載三月二十
八日安定胡英裝朝議郎檢校尚書金部員外郎徐浩

(三八〇) 與殷侯物示，當爾不可不卿定之，勿疑。下字注

(三八一) 李母猶小小不和馳情伏想行平康鄰新婦大都小差卿大小佳四字別行縫有僧權字

(三八二) 近書至也得十八日書為慰雨蒸各可不參軍轉差也懸耿吾脚痛劇炙不得力至患

之不得書自力數字縫上僧權字不全開元十五年跋尾其折處非體卷翰印措處

(三八三) 足下當為遠慮不可計日前僧權

(三八四) 省示知足下奉法轉到勝理極此此故蕩滌塵垢研遣滯慮可謂盡矣無以復加四字注

襟園比之殊誕謾如下言也吾所奉設教意政同但為形迹小異耳方欲盡心此事所以重增辭世之

篤今雖形係於俗誠心終日常在於此足下試觀其終與充權映

(三八五) 適都十五日間清和傳賦問定寂寂當是虛也然始與郡奴屯結不肯出恐成令人邑

邑但官吏長制之耳

(三八六) 雨寒卿各佳一字注不諸患無賴力無不一一義之間清君庚雖篤疾謂必得治力豈圖凶

問奄至痛惋情深半年之中禍毒至此尋念相摧不能已已况弟情何可任遮等荼毒備盡當何可忍

視言之酸心奈何奈何可懷君懷

(三八七) 此公立德由來而嬰斯疾每以惋慨常冀積善之慶當獲潛佑契同昔人尋億闕事緬

然永絕哀惋深至未能喻心省足下書固不可言已矣可復奈何絕筆流涕

(三八八)足下各可耳復雨可厭若吾所噉去不復辭此意想足下明必顧之遲散羲之頓首

(三八九)范公及阮公阮并微旨足下謂合損益之耳不謝

(三九〇)羲之死罪累白至也辱十四日告慰情念轉寒想善平和下官至匆匆自力白羲之死

罪諸人何似耿耿

(三九一)遣令使白恐不時至耳

(三九二)奉黃柑二百不能佳想故得至耳船信不可得知前者至不

(三九三)云停雲子代萬頃桓公至今令荀臨淮權領其府懷祖都共事已行前僧

(三九四)月十三日羲之頓首追傷切割心不能自勝奈何奈何昨反想至向來快雨想君佳方

得此雨爲佳深爲欣喜信既乏劣又頭痛甚無力不一王羲之頓首

(三九五)兄靈亟垂至永惟崩慕痛貫心膂痛當奈何計慈顏幽翳十三年而吾勿勿不知堪臨

始終不發言哽絕當復奈何吾頃至劣劣比如下昨

(三九六)羲之頓首想創轉差僕其爾未欲佳憂憤力知問王羲之頓首長史

(三九七)三月十三日羲之頓首近反亦至念足下哀悼之至不可勝更寒外足下何如吾劣力
遺知問王羲之頓首

(三九八)書雖備至聚宜有以宣事情今遣羊參軍西諸懷所具必欲一字注今觀想可思今得時

面克令得還也僧繼徐浩

(三九九)羲之白一日殊不綖關懷得書知足下咳劇甚耿耿護之冀以散力不一王羲之白

(四〇〇)知德孝故平平想當轉得散力每耿耿不忘懷足下小佳不

(四〇一)忽然夏中感懷冷冷不適足下復何似耿耿吾故不佳得遠近問不虞生何當來遲一

集昨見無奔十九日三字注書二十六日西也云仁祖服石散一齊不覺佳醅羸至可憂力知問王羲之

書白

(四〇二)書成得十一日疏甚慰之舍動靜馳情先書已具不得一一

(四〇三)知汝表出便去不得見汝此何可言想秋必還恐此書不復及汝不一漫後有四行字是韓晉公章草批

(四〇四)九家真慰鸞開鶴瑞集客登秦望書一紙

(四〇五)孔侍郎著作闕三字朝當時侍從庾參軍兄弟三人輒承命參軍弟至都孫道常約孔東

遷駒承命長曹言切勅侍從承命謝功曹長旭故夫謝輜死罪奉命輒侍從塗三孔孝廉前吏孔
琨死罪命違輒侍從王征東郎最言輒當侍從孫參軍定伯承命

(四〇六)王逸少字嗣頓首謝七日登秦望可俱行當早也僧繇注字

(四〇七)諸患者復何如懸心比疏已具不復一一

(四〇八)桓安西觀自代蜀五

(四〇九)書勿勿未得遣信又不知足下問吾既不快弱小疾苦甚無賴損尙小停有定定字注去

日更與足下相聞還不具王羲之白

(四一〇)兒故未至不知何父知足下念

(四一一)適書至也此人須當令溷想足下可爲停之故示王羲之頓首徐僧權徐浩

(四一二)六月三日羲之白徂暑此歲已半載慨深可得二十七日書知足下安頓耿耿愁增患

耶善消息吾至勿勿常恐一夏不可過不一一王羲之白

(四一三)賊以還不知遇官軍云何可深憂之欲依上虞初到別上今勅聽之縣事不同直不相

連耳

(四一四)且奉祠感思悲慟得書知問吾之劣力不一王羲之問僧禱

(四一五)重熙去具今子日與曹論謝驛吾又不下蔡書一足下清談四字注想必有理耳長任

比得解未吾與二字注江生論書答如此足下思所向示之要至懷也須卿示

(四一六)王逸少頓首敬謝各可不欲小集想集後能果想曹參軍疾者已往必能同來

(四一七)得告慰為妹下斷以為至慶吾比日至末果殊有邑想王羲之頓首

(四一八)見弘遠二書皆以遠也動散即佳為慰

(四一九)足下晚各何似恆灼灼吾坦之欲不復堪事內然力不一王羲之頓首前邊僧禱後邊診

(四二〇)足下各復何似恆灼灼故問王羲之白

(四二一)足下似有董仲舒開閉陰陽法可勅令料付不雨憂之深重

(四二二)曹庾王六君別六字別行僧禱

(四二三)羲之頓首君可不語差也耿耿力之間王羲之頓首

(四二四)上下無恙從妹佳也得敬和近聞不人有至憂其疾者令人深憂隔久何日能來六字別行

(四二五)曹參軍三字別行診哲弟僧禱開元五年闕十五日倍戎副尉臣張善慶裝云云

(四二六) 累書想至君比各可不僕近下數日勿勿腫劇數爾進退憂之轉深亦不知當復何治
下由食穀也自食穀小有肌肉氣力不勝更生餘患去月盡來停穀噉麵復平平耳

(四二七) 知玄度在彼善悉也無由見之此何可言

(四二八) 今與王會稽丘山陰書借人想故當有所得又語丘令臨葬二字必得耳縫上

(四二九) 知劉公差甚慰甚慰知前乃爾委頓追以怛然今轉平復也阮公近聞不萬轉差也

(乙) 右軍名迹考證

右軍作草如真作真如艸爲百世學書入立極惟以後代真跡難得輾轉翻刻失其神韻而其法
乃絕於人手

右軍之書以正書見長有黃庭經樂毅論東方朔畫贊告誓文孝女曹娥碑等行書有蘭亭敘洛
神賦喪亂帖等等艸書有十七帖快雪時晴帖茲摘述其源流

(一) 黃庭經

黃庭經爲右軍第一正書。開元間尙存大內。據唐徐浩古蹟記云：「玄宗開元五年（公元七一七年）十一月五日收綴大小二五真蹟得一百五十八卷。大王正書三卷。內黃庭第一。畫贊第二。告誓文第三。」可以知矣。及天寶末（約公元七五五年）潼關失守。內庫法書皆散失。初收城後。徐浩充使搜訪圖書。收獲二王書二百餘卷。訪黃庭真蹟。或云張通儒將向幽州。莫知去處。後世所傳真蹟。乃唐人摸搨本。其刻於石者。在宋已有二三本。多從唐摸本上石。嗣後翻本甚多。收藏家得宋石刻。已
是絕頂矣。

按梁虞蘇論書表云：「爲山陰道士寫道德經。」晉書本傳亦云：「爲寫道德經。嘗以羣鵝相送。」未嘗言寫黃庭經。後世所謂黃庭經。乃道德經之誤傳。李太白送賀監詩。亦不免有「山陰道士如相送。應寫黃庭換白鵝。」之誤。實則右軍嘗寫黃庭授子敬。另寫道德經付山陰道士也。觀於梁陶隱居與梁武帝啓云：「逸少有名之迹。不過黃庭。勸進告誓。數首不審猶有存否。」而益信。

(二) 東方朔畫贊

東方朔畫贊筆圓靜而勁。肥瘦得中。係永和十二年（公元三五四年）五月十三日右軍所書。

據董道廣川書跋云：「王濛子脩（字敬仁）嘗求書於右軍，右軍爲寫東方朔畫贊與之，及脩亡，其母見子平生所愛，內置棺中，則此書早已不傳矣。今所傳者，蓋後人爲之託逸少以傳也。」此說未可置信。蓋王脩生於晉咸和九年（公元三三四），卒於晉升平元年（公元三五七），而唐玄宗開元十三年（公元七二五）收綴之王真蹟一百五十八卷，大王正書三卷，畫贊第二特別提出，故開元間畫贊真跡猶存。至內置王脩棺內者，當係它帖。據南齊王僧虔論書云：「納置棺中者，鍾繇宣示也。」僧虔在前，疑爲董道考證之誤。至畫贊真蹟，究在何時散失，以無確據，自難論斷也。

（三） 告誓文

告誓文入晉書本傳中（本書第四王羲之之生活及人格已載全文）逸少因淡於仕進，於永和十一年（公元三五五年）三月九日撰文告誓於父母墓前，永不出仕，并自書其文。其書爲一字數體，一體別成點畫，不可一概求之。如字有橫顯異法，行法變草，未嘗復出，實天下奇作也。開元五年告誓猶存（據唐韋述敘書錄云：「開元五年（唐玄宗年號公元七一七年）敕陸元梯檢校御府珍藏，告誓猶存。」）其後羲之七世孫智永嘗臨右軍五紙告誓第一，何時散佚，殆難考證。至後世所

見者或爲唐寫經手搨摹以傳，或爲永師摸本之翻刻耳。

(四) 孝女曹娥碑

東漢時上虞女子曹娥，因父溺死，亦投江而死，經五日抱父屍出，度尙使弟子邯鄲淳爲作誄詞，立石。蔡邕夜摸其文讀之，題「黃娟幼婦，外孫齏白。」八字，卽絕妙好詞四字之隱語。按蔡邕所見，應是八分古碑，今所稱曹娥碑法帖，乃晉王羲之書，小楷，字體奇而古，筆勁如鐵，非右軍必不能。後世流傳者，乃摸搨翻刻之本。

(五) 樂毅論

樂毅論乃右軍手書，以貽子敬者。右軍亦頗自珍惜，右軍筆勢論語子敬云：「吾書樂毅論一篇，貽子藏之，勿播於外。王氏累世學此，得成，自外皆達，勿以難學而自惰焉。此論日有丹陽僧求吾，吾不與也……」可以知矣。此論始入於梁武，後歸陳。陳文帝以賜始興王，貞觀中進御。十三年，命褚遂良排署，并令直弘文館馮承素臨寫，賜司空長孫無忌、房玄齡、高士廉、侯君集、魏徵、楊師道六人臨寫之。

本亦復筆勢精妙，備盡楷則。至中宗朝（公元七〇五至七〇七）人主特愛樂毅論，以織成錦袋盛置作箱，當籍歿時，咸陽老嫗竊舉，補中縣吏尋覺，遽而奔，趁嫗乃驚懼投之，爨下，真跡遂亡。其後所傳，殆爲刻石翻本。據清馮武書法正傳云：「……未有二石，其一爲秘閣所刻，其一爲高紳學士家所藏……蓋皆摹本。壽諸石者也。秘閣石刻，未知所在。高紳學士家所藏不全石刻。（至海字止，四才得一耳）又亡於火。（據集古錄云：「樂毅論石在高紳學士家，紳死，家人初不知惜，好事者往往就閱，或摸傳其本，其家遂秘藏之，漸爲難得。後其子弟以其石質錢於富人，而富家失火，遂焚其石……」）後世所傳石刻完本，意是秘閣石搨本翻出，未可知也。」

（六）蘭亭敘

蘭亭帖者，王羲之逸少所書之詩序也。右軍蟬聯美胄，蘭散名賢，雅好山水，尤善草隸，以晉穆帝永和九年（公元三五三年）暮春三月三日，宣游山陰，與太原孫統承公、陳郡謝安安石、高平郗曇重熙等四十一人，同游蘭亭，逸少製序，酒酣興樂而書，用鼠鬚筆，蠶繭紙，遒媚勁健，絕代所無。凡二十八行，三百二十四字，字有重者，皆構別體，就中之字最多，至二十許字，轉變悉異，其時似有神助，醒後

它日更出數十百本，終不如之。右軍亦自愛惜，留付子孫。傳至七代孫智永，卽右軍第五子徽之之後，故獨傳家法爲隋唐間諸家所師。智永年近百歲乃終，其遺書付弟子辯才（才俗姓袁氏，梁司空昂之元孫，博學工文，琴書棋畫皆臻妙境，嘗於所寢伏梁上鑿閣檻以貯蘭亭，寶重過於其師）。太宗聞之，令蕭翼計取入大內，并命供奉搨書人趙模、韓道政、馮承素、諸葛貞等四人爲搨數本，以賜皇子近臣。太宗崩，遺命入昭陵，真迹遂亡。（據周越法書苑載：「太宗嘗一日附耳語高宗曰：『吾千秋萬歲後，與吾蘭亭將去也。』及奉諱之日，用玉匣貯之，藏於昭陵。」）惟趙模所搨者傳於世（事見何延之蘭亭記）。據宋張舜氏畫慢集載：「其後昭陵累經開發，蘭亭復出人間……今不復聞存歿。」可知蘭亭復出人間一事，在宋代亦不過爲一種傳說而已。（按蘭亭脩禊序，晉人謂之臨可序，唐人稱蘭亭詩序，或言蘭亭記，歐陽詢之脩禊序，蔡君謨云曲水序，東坡云蘭亭文，山谷云觀詠序，適古今雅俗所稱，俱云蘭亭，宋高宗所御宸翰題曰禊帖。）

蘭亭真蹟既已失傳，則流傳世間者，卽爲石刻。而定武石刻（按宋慶曆中，宋仁宗年號公元一〇四一至一〇四八年）宋祁帥鎮日有學究李姓者，藏蘭亭石，死於妓家，樂營將河水清者，得以獻祁，祁秘藏不妄與人，留於公庫，因謂之定本——據宋桑世昌蘭亭考）世稱善本。此石在宋慶曆

中藏士人李姓家。不以視人。韓獻忠之守定武也。李生瘞石地中。別刻石本示公。其後李氏子負緡無從取價。時宋景文守定。乃以公帑金代輸之。因取石匣藏於庫。須貴游交舊。不可得也。其後於宋熙寧間薛珣出牧。其子紹彭。又刻別本者。留之山中。易古刻攜歸長安。一時內侍梁師成爲長安承受官。批旨取舊刻。嗣昌以紙三幅作一重撫石。第一本墨深。第二本墨淺。第三本又加淺。世謂之蟬翼本。大觀中（公元一一一〇至一一一七）詔取其石置宣和殿。人間不復見矣。（據何蓮春潛紀聞）蘭亭石刻傳世者以歐陽詢褚遂良之摹本較佳。然傳刻甚多。茲據宋桑世昌蘭亭考所載。并參考諸籍列爲七十八本。並分別加以考證。

一、御府刻本 計有五本：

（一）紹興元年（宋高宗年號公元一一三一年）秋八月十四日刊定武本後有寶字方印及御製跋。

（二）會字全不界行。斯文下有真觀單印。上角微圓。末篆書題真觀石刻紹興乙卯（宋高宗年號紹興乙卯爲紹興五年公元一一三五年）重刊。

（三）闕在癸丑山陰之蘭亭脩長。此林脩竹又有清流激湍。共二十一字。有紹興雙印。

(四) 領字有山字會字全無界行有紹興雙印

(五) 會稽下闕山字蛟篆紹興雙印

二、定武刻本 有下列六本

(一) 天字小損其字瘦勁

(二) 天字全字肥

(三) 鑄損滯流帶右天五字

(四) 崇山字中斷第六第七第八三行破裂無絲竹管弦之一觴一詠亦足以是日也十六字

榮苜云定武「脩城役夫所得後歸康惟章家」

(五) 聚本刻五字不損

(六) 亭列幽盛游古不羣殊九字不全

三、會稽刻本 計有三本

(一) 宋宣和間(宋徽宗年號公元一一一一至一一二五)辛道宗被命平二浙賊訪蘭亭

遺跡於天章寺以山陰無蘭亭帖謂爲闕遺遂以唐臨本刻石闕雖當其欣於己快然自

足不之將至所之既倦情隨事等字又第五字有察字

(二)刻蠟紙本有少長咸欣俛仰之間以爲陳迹猶不十四字雙鉤不填後題乾符元年(唐僖宗年號公元八七四年)三月

(三)後有僧權署字係題宋太祖開寶十八年三月二十日

四、洛陽刻本

(一)不痛哉若合一契兩行之間甚闕止無會字

五、邯鄲刻本

(一)宋元祐四年(宋哲宗年號公元一〇八九)年張揉官邯鄲時以家藏定武蘭亭刻石以永其傳自第一行至第十七行下皆損一字移注於其上

六、婺女刻本 計有三本

(一)在倅廳自第十三行至末橫裂而上又自二十八行後自裂處五行詢之耆老云其石碎已百年王自牧家有未經刻缺時本庶幾定武典型也

(二)得自南澗家

王羲之書跡目錄及其著名書跡考證

(三)褚遂良貞觀八年所模，序首無永字，雖古而未盡善也。

七、豫章刻本 計有三本。

(一)前有忠孝之家方印，後題唐貞觀中石本，後六印作一行，錢形忠孝之家印，黃扉珍玩，又三印字不可辨，末同前方形。

(二)在法帖內，第十一、十二、十三行有橫裂文。

(三)脩城所得本，前有薛稷書「義寶過盈尺，參神明以長生，匪以曜物得麒麟」兩行十八字，後高宗皇帝取石入德壽宮，（據王仲信跋云：此本得於西霞老道士云長安政和中）（宋徽宗年號公元一一一一至一一一七年）脩故宮掘地得此石，其精神鋒銳，在真定本上。

八、閩刻本

(一)刻貞觀本，與豫章同，前有忠孝之家方印，後亦同前六印，但第五印在後行，下有漢北平守世家印，印後方題唐貞觀中石本。

九、括蒼刻本

(一)會字全有界行。後題模家本留刻仙都。紹聖丁丑蜀人劉涇。

十、金陵刻本

(一)熙寧丁巳(宋神宗年號丁巳爲熙寧十年公元一〇七七年)六月二十七日省局手裝堯民誌。後跋云：「蘭亭石刻。世以定武爲最。先公熙寧間得此本。誌而藏之。逮今七十

有一年。懼歲久手澤湮漫。併刻於建鄴府治。紹興丁卯十一月旦清豐晁謙之謹題。」

十一、上饒刻本

(一)汪氏本。刻同豫章。自第十至十四行橫裂。後有汪德輝。忠衛社稷之家二印。

十二、景陵刻本

(一)自第一行首。至第七行末。裂文甚大。乃景陵郡齋舊物。湮沒民間日久。郡守何文度得之。

紹興丁丑歲十月十有二日跋。

十三、九江刻本

(一)自第五行首。至第九行末。有大裂文。

十四、龍舒刻本

(一)刻褚書，有篆額蘭亭記作長行，後有黃扉珍玩忠孝之家圓方兩印，題貞觀八年（公元

六三四年）褚遂良摹。

十五、八桂刻本

（一）用朱寶晉本，開後有朱氏印記。

十六、永嘉刻本

（一）字大行闊，并刻乾封二年（唐高宗年號公元六六七年）懷仁集右軍及序，有秦吳三跋。

十七、丹丘本

（一）前薛稷篆十八行字者，原存彭漕家，云得之淘河之夫。

十八、常德刻本

（一）乾道間所刻，具三體，仍書……林一事尤佳。

十九、臨川刻本 計有二本

（一）掘出麻姑石本，列坐盛是日六七八三行裂損十九字。

(二)無會字及界行。後有玉册官楊仙芝摹刻八小字。

二十、周安惠家本

(一)此本原存秀邸。有曾伯彥思跋。曾得於越之姪衍。及大觀己丑。宋徽宗年號己丑爲大觀三年。公元一一〇九年。歲也。紹興癸酉。宋高宗年號癸酉爲紹興十三年。公元一一四三年。重加表飾。已四年。

二十一、陳氏本

(一)簡齋用池紙臨。中闕痛字。高宗所賜臨本亦然。似是御本寫也。

二十二、三米本

(一)米氏父子模刻於淮山樓。

二十三、杵本

(一)因刷地而得者。有柄竅。初號杵蘭亭。後易爲楮。

二十四、陶氏本

(一)陶憲定字安世。多藏秦漢以來古物。有定武本。

二十五、諸葛氏本

(一)字極大，恐是別本模。

二十六、錢氏本

(一)前後凡七印，有文僖公手書，唐貞觀中（唐太宗年號公元六二七至六四九年）石本

六字，紹興癸酉夏六月元孫傑之刻。

二十七、中山王氏本

(一)此本前瘦後肥，體畫溫潤，有典型，後列六印亦佳。

二十八、吳氏本

(一)斯文下有吳璜書印。

二十九、尤氏本

(一)遂初尚書用楊伯時本刻。

三十、劉氏本

(一)字極大，無言所刻，會字全，餘皆不闕。

三十一、范氏本

(一)脩禊帖用定武墨本重摹入石。紹興十六年(宋高宗年號公元一一四六年)八月戊

申方城范序長識。

三十二、邵武本

(一)後有勳字、圓印、政和乙未(宋徽宗年號政和乙未爲政和五年公元一一一五年)暮

秋望重刻定武古本。陽羨邵勳記。

三十三、陸東之本

(一)王氏金石錄云：五言蘭亭詩二十四行，而蘭亭只類重刻錢本。又有陳和叔、鄒國公東坡

子由跋。

三十四、潘氏本

(一)在安吉縣第二十及二十一兩行裂，失無期於昔人之懷七字。

三十五、石氏本

(一)石熙明家有二。

三十六、唐硬黃本

(一)薛紹彭勒唐搨本第十四行僧字上有察字且有鋒銛(又清閑堂本後有紹彭二字)

三十七、織本

(一)松窗雜錄載元宗先天時所有異物如雷公鎖辟塵犀簪暖金之類凡十有三西蜀織成

蘭亭紋是其一也。

三十八、殘石本

(一)此得之殘闕之餘仍作二塊前一塊有悲夫雖殊事一也後之攬文共十一字下有小子

云蘇氏太簡後一塊復裂爲二字已漫滅但彷彿先世名玩文五字可辨。

三十九、南嶽本

(一)後有定武仍孫伯傑六字篆印

四十、章氏本

(一)申公家刻中有橫斷紋有章氏印。

四十一、盧氏本

(一)斯文下有盧宗道三字印。後題唐硬黃本。淳熙乙未中秋刻。
四十二徐滋本

(一)在湖州。瘦勁而皴剝。自十七十八行內有大裂文。
四十三無名本

(一)此本無名氏。會字全。後有云：「蘭亭揚傳刻。諸家所收本極多。未有及此者。不知誰書。」
四十四武陵本

(一)無僧字。

四十五王氏藏本

(一)凡十帙。殆百本。以定武舊本爲首。此本副之。

四十六玉枕蘭亭

(一)宋賈似道得一砮砮石枕。光瑩可愛。欲刻蘭亭而患其小。有一鑄者。傳謂婺工王用和。刻於悅生堂。經年乃就。故一名悅生蘭亭。以燈影鑿其字。宛如定武本。缺損皆全。賈開宴賞之。世號玉枕蘭亭。今稱玉版者謬也。(據至正直記)

四十七、落水蘭亭

(一)蕭千巖之姪滾得白石舊藏五字不損本禊序後歸之俞壽翁趙子固後從壽翁善價得之喜甚乘舟夜泛而歸至晉之弁山風作舟覆幸值支港行李滄溺無餘子固方被濯衣立淺水間手持禊帖向人曰蘭亭在此餘不足介意也因題八言於卷首云性命可輕至寶是保世稱落水蘭亭(據齊東野語)

四十八、魯子學本

(一)後歸沈虞卿(據宋俞松蘭亭續考)

四十九、俞氏本

(一)原藏宋俞松家有東坡題跋(據蘭亭續考)

五十、唐絹本

(一)原藏劉涇家有米元章題跋(據蘭亭續考)

五十一、永徽撫本

(一)有米元章題跋(據蘭亭續考)

五十二、李鳳山所藏本

(一)此本迺王彥昭侍郎文房物，後歸李鳳山。(據蘭亭續考)

五十三、王岐公本

(一)此本後藏俞松家。(據蘭亭續考)

五十四、李西臺臨本

(一)此本爲唐人所臨，後有建中押尾，建中乃李西臺名也，原藏俞松家。(據蘭亭續考)

五十五、沈伯愚所藏本

(一)此本爲吳說傳明得諸薛氏者，其題籤爲薛紹彭手書。(據蘭亭續考)

五十六、曾禹任所藏本

(一)此本係曾禹任得之諫大夫毛氏，毛氏得之淮陰者，有楊誠齋跋。(據蘭亭續考)

五十七、袁起巖本

(一)有楊誠齋跋。(據蘭亭續考)

五十八、鄭雙槐本

(一)原藏鄭價裕齋家後歸俞松(據蘭亭續考)
五十九、蕭千巖所藏本

(二)有姜夔堯章題跋(據蘭亭續考)

六十、姜堯章所藏本

(一)有秀巖老人李心傳題跋(據蘭亭續考)

六十一、范文正公所藏本

(一)有李心傳題跋(據蘭亭續考)

六十二、歐陽文忠公所藏本

(一)有李心傳題跋(據蘭亭續考)

六十三、高皇御書臨寫本

(一)有俞松及李心傳題跋(據蘭亭續考)

六十四、徽皇御書臨寫絹本

(一)有李心傳題跋(據蘭亭續考)(共七十八本)

(七) 洛神賦

古人書目多云逸少洛神賦。然真迹亡之久矣。子敬好書此賦。所存者僅十三行二百五十字。(據離鈎) 繫晉麻紙。字畫神逸。墨彩飛動。未有柳公權跋語。近世翻本皆從此也。至另有小楷全本。未知其淵源何自。

(八) 十七帖

此帖號十七者。以卷首有十七字故名。據宋黃長睿東觀餘論跋云：「逸少十七帖。乃先唐所刻石本。今世間有二刻本。其一刻於汴梁。卷首有大敕字。褚遂良解無畏校。此最佳。蓋唐本也。其一無敕字。洛陽李邕鄆家所蓄舊本。其餘世傳別本。爲賀知章所臨。南唐李後主煜得之。勒石置澄心室者……」又有一板本亦似南唐刻者。第敘次頗舛。文爲十七帖。而誤目爲十八帖。字亦瘦弱失真……」近代又有翻刻多無足取。在淳化絳帖。東庫本。大觀。太清樓。戲魚堂。星鳳樓。諸類帖中者。爲較佳。其餘無足論矣。

(九) 快雪時晴帖

羲之行書之一文云：「……快雪時晴，佳想安善，未果爲結力不次……」以文中有快雪時晴字，世謂之快雪時晴帖。書畫舫載：「王百谷徵君藏逸少快雪時晴帖，白麻紙真蹟，唐宋秘府官本會入寶晉齋中，米元章有跋，又入元御府，趙子昂以下奉敕跋者三人。」及至清代涿州馮銓（萬歷進士，仕清爲戶部尙書，禮部尙書）彙刻叢帖，以羲之快雪時晴帖摹泐爲第一帖，卽以快雪名堂，帖名快雪堂帖。集古求真載：「快雪堂帖凡五卷，其中諸帖大半由真跡模出，故是帖久爲世人所重。後馮子孫不能守，析離爲二，同歸質庫州牧黃可潤贖之，以歸總督楊樸園，購以進奉，遂入內府，作快雪堂以貯之。原有木刻三版，乃悉易以石，馮爲涿州人，故初出墨本，名曰涿榻。至爲珍貴，黃爲福建人，故次榻者名曰建榻。再次曰內榻，首有乾隆御筆快雪堂記。」墨跡藏清宮甚久，逮清室滅亡，始移歸北平故宮博物院。該院舉辦兩次古物展覽，均經陳列，余嘗寓目焉。該帖正文外有山陰張侯題字，乾隆御筆題識，及乾隆御覽之寶圓印。紙雖陳舊，模糊不清，細觀用筆，殊少遒媚勁健之態，不類羲之所作，疑爲唐人雙鉤之迹。然則真跡久經不存人間矣。（按日本平凡社書道全集第五卷印影印者，卽爲清

內府所藏之墨跡

(十) 喪亂帖

喪亂帖爲羲之行書之一日本平凡社出版之書道全集第五卷曾影印之。十七行百十四字。文曰：「羲之頓首。喪亂之極。先墓再離荼毒。追惟酷甚。號暴摧絕。痛貫心肝。痛當奈何。奈何。臨紙感哽。不知何言。羲之頓首。頓首。」(以上第一段)「二謝面未比面。遲良不靜。羲之女愛再拜。想邵兒悉佳。前患者善。所送儀當試尋省。左邊劇。」(以上第二段)「得示知足。下猶未佳。耿耿吾亦劣。明日出乃行。不欲觸霧故也。遲散。王羲之頓首。」(以上第三段)「據書道全集附錄釋文解釋。稱此帖爲奈良朝」按奈良爲日本古都。自元明皇以來。都此者凡七十五年。(公元七一〇至七八四年)聖武天皇執政(約當唐玄宗(公元七一三至七五五年))時。流落日本者。此帖逾媚勁健。筆迹清楚。絕非後人摹搨之本。斷爲羲之墨蹟無疑。羲之流傳人間之蹟。當以此爲第一。然徧檢中國往昔論書專著。無一述及此帖。意者此帖流傳日本。遠在唐代。唐目者少。故無人論及之耳。

(十一) 淳化閣帖

北宋太宗淳化中（公元九九〇至九九四年）詔侍書王著就內府所藏古今名跡釐定摹勒成爲十卷，其中雖真僞雜出，錯亂失序，然大都仍屬真跡。王著所編之原刻，既已真贋糅雜，輾轉翻刻，未免加甚。嗣後此種法帖，流傳極廣，宋太宗固篤好羲之書法，而同時奉命編纂之王著，亦極端崇拜王書，故十卷中，羲之父子之書，竟有五卷之多。清王澐著淳化秘閣法帖考正，言之甚詳，可以參考。

八 歷代書家對於王羲之書法之評論

王羲之書不僅見重於後世，亦復見重於當時。歷代論其書法者，其言莫可紀極，然猶因人而傳，其餘糜盡泯滅者，又何可勝數耶。本篇止摘其最要者耳。

(一) 晉庾翼（見晉書列傳第五十一王羲之傳）

先生書初不勝庾翼情，鄙及其暮年方妙，嘗以草草答庾亮，而翼深歎伏。因與先生書云：「吾昔有伯英草十紙，過江顛狽，遂乃忘失，常歎妙迹永絕，忽見足下答家兄書，煥若神明，頓還舊觀。」

(二) 梁庾肩吾 (見唐張彥遠法書要錄卷二)

梁庾肩吾於書品論中舉善草隸書家一百二十八人，列張芝 (伯英) 鍾繇 (元帝) 王羲之 (逸少) 三人爲上之上。是先生之書在當時已列爲第一流矣。

(三) 梁袁昂 (見袁昂古今書評)

袁昂於古今書評稱：「王右軍書如謝家子弟，縱復不端正者，爽爽有一種風氣。」

(四) 宋 (六朝) 羊欣 (見羊欣能書人名)

宋羊欣能書人名云：「王羲之晉右將軍，會稽內史，博精羣法，特善草隸，古今莫二。」

(五) 唐太宗 (見唐太宗王羲之傳書後)

唐太宗於古今之書最好王羲之書，其所作王羲之傳書後略云：「鍾繇妙墨擅美一時，後之論者謂當時無能出其右，其果盡善盡美歟？蓋其分布之纖濃疏密，誠如雲霞之舒卷，吾無間然。然其體是古而非今，字則過長而逾制，此其瑕疵也。王獻之雖有父風，別無新意，其字體疏瘦如隆冬之枯樹，枸束如嚴家之饑隸，若枯樹之槎枒，而無屈伸，又似饑隸被羈，羸而不放，兼斯二者，翰墨之病也。蕭子雲最爲晚出，擅名江南，然書法委弱，曾無丈夫之氣，而行墨之間，如春蚓之縈洄，如秋蛇之縮曲，毫無

筋骨峻嶒之象徒負虛名耳。此數人者皆鑒過其實。曠觀古今堪稱盡善盡美者。其惟王逸少（羲之）乎。心摹手追。惟此而已。餘子碌碌。殆不足數。唐太宗推崇羲之書於此可見。

（六）唐孫過庭（見孫過庭書譜）

孫過庭於書譜中論羲之書頗詳。摘其要點如云：「……元常（鍾繇）專工於隸書。伯英（張芝）尤精於草體。彼之二美而逸少兼之……右軍之書代多稱習。良可據爲宗匠。取立指歸。豈惟會通今亦乃情深調合……是以右軍之書末年多妙。」

（七）唐張懷瓘（見張懷瓘書議）

唐張懷瓘書議舉崔瑗、張芝、鍾繇、張昶、鍾會、韋誕、皇象、嵇康、衛瓘、衛夫人、索靖、謝安、王導、王敦、王羲之、王珣、王珣、王羲之、王獻之等十九人。從真行草四體書論其得失。其論羲之者爲（一）真書第

一（二）行書第一（三）章草第五（四）艸書第八。

（八）唐張懷瓘（見唐張懷瓘書斷）

唐張懷瓘書斷將歷代書家分爲神品、妙品、能品、三等。計神品二十五人、妙品九十八人、能品一百七人。羲之書列等如下：（一）隸書列入神品（二）行書列入神品（三）章艸列入神品（四）

飛白列入神品（五）草書列入神品（六）八分列入妙品。

（九）唐張懷瓘（見唐張懷瓘書估）

唐張懷瓘書估分歷代書家爲十等，羲之書列爲第一等（除羲之外列第一等者有黃帝、史、周宣、史、鍾繇、張芝、崔瑗、衛瓘、索靖、王獻之八人）。

（十）唐張彥遠（見唐張彥遠法書要錄）

唐張彥遠法書要錄云：「……尤善書，艸隸八分飛白章行備精諸體，自成一家法，千變萬化，得之神功，登尤造化發靈，豈能登峯造極……」

（十一）唐李嗣真（見唐張彥遠法書要錄卷三）

唐李嗣真書品後取自秦至唐書家八十一人，分爲十等計：（一）逸品五人（二）上上品二人（三）上中品七人（四）上下品十二人（五）中上品七人（六）中中品十二人（七）中下品七人（八）下上品十三人（九）下中品十人（十）下下品七人。羲之書則列爲逸品。

（十二）唐徐浩（見唐張彥遠法書要錄卷三）

唐徐浩論書云：「……鍾善真書，張稱艸聖，右軍行法，小令破體，皆一時之妙。」

(十三) 宋俞松(見俞松蘭亭續考)

宋俞松蘭亭續考云：「論漢魏以後法書，東晉爲第一，就晉人論之，右軍又爲第一。」

(十四) 宋高宗(見宋高宗翰墨志)

宋高宗翰墨志云：「余每得右軍，或數行或數字，手之不置，初若食口喉間，少甘則已，未則如食橄欖，真味久愈在也，故尤不忘於以手。」

(十五) 明王世貞(弇州)(見清馮武書法正傳二書家品藻)

明王世貞書家品藻云：「右軍書貴在肉中，趣在法外，勢緊淳古，意不可到。」

(十六) 清馮鈍吟(班)(見馮班鈍吟書要)

鈍吟書要云：「董宗伯(其昌)云：『王右軍如龍，李北海如象。』不如王右軍如鳳，李北海如鷹。」

(十七) 清包世臣(見包世臣藝舟雙楫論書三)

清包世臣藝舟雙楫云：「右軍作草如真，作真如草，爲百世學書人立極。」

九 王羲之逸事

(一) 先生年十歲。大將軍甚愛之。恆置帳中眠。大將軍嘗先出。先生猶未起。須臾錢鳳入。屏人論事。都忘先生在帳中。便言逆節之謀。先生覺。既聞所論。知無活理。乃剔吐汗頭面被褥。詐熟眠。敦鏡論事造半。方意先生未起。相與大驚。曰：「不得不除之。」及期。長乃見吐。垂縱橫。信其實熟眠。於是得全。於時稱其有智。——據世說新語。

(二) 先生性愛鵝。會稽有孤居姥。養一鵝善鳴。求市未得。遂攜親友命駕就觀。姥聞先生至。烹以待之。羲之嘆惜彌日。——據晉書王羲之傳。

(三) 山陰曇曠一作融村有一道士。養好鵝十餘。先生清旦乘小船故往。意大願樂。乃告求市意。道士不與。百方譬說。不能得。道士乃云：「性好道。久欲寫河上公老子。」(按即道德經)「縑素早辦。而無人能書。府君若能自屈書道德經各兩章。便合羣以奉。」羲之便半日爲寫畢。籠鵝而歸。——據馮武書法正傳。

(四) 先生罷會稽內史。住蕺山下。一老嫗揚十許六角竹扇出市。先生問：「一枚幾錢？」云：「

值二十許。」先生取筆書其扇，扇爲五字，嫗大悵惋云：「一家朝蜜，惟仰於此，何書壞。」先生云：「但言王右軍書字索一百。」入市，市人競市，老嫗復以十數扇來請，先生笑而不答——據馮武書法正傳。

(五) 先生嘗表與穆帝，張翼寫效，一毫不異，題後答之初不覺，更詳看，乃嘆曰：「小人幾欲亂真。」——據馮武書法正傳。

(六) 先生嘗詣一門生家，設佳饌，供億甚盛，感之，欲以書相報，見有一新棊几，至滑淨，乃書之，草正相半，門生送先生歸郡，其父已刮盡，生失書，驚懊累日——據晉書王羲之傳。

(七) 先生爲會稽內史時，其第七子獻之七八歲學書，羲之從後掣其筆，不據脫，嘆曰：「此兒書後當有大名。」——據馮武書法正傳。

(八) 先生七歲即善書，年十二見前代筆說於父枕中，竊而讀之，父曰：「爾何來吾所祕。」先生笑而不答，母曰：「爾勸用筆祕法否。」父見其小，恐不能祕之，不與語，先生拜曰：「今藉而用之，使待成人晚矣。」父遂與之，不盈期，月書大進——據馮武書法正傳。

(九) 晉太尉郗鑒使門生求女，婿於王導，導令就東廂徧觀子弟，門生歸謂鑒曰：「王氏諸少

并佳。然聞信至，咸自矜持，惟一人在東床坦腹食，若不聞。鑿曰：「正此佳婿耶。」訪之，乃先生也。遂以女妻先生。——據晉書王羲之傳。

(十) 甥生爲會稽內史時，於永和九年三月三日，集文人雅士會於山陰之蘭亭，詩酒流連，歡暢竟日。醉後以鼠鬚筆蠶繭紙書所爲蘭亭集叙，書法逾媚勁健，若有神助。時年才三十三，與會者四十一人，成詩兩篇者計王羲之、謝安、謝萬、孫綽、徐豐之、孫統、王凝之、王宿之、王彬、王徽、袁嶠十一人。成詩一篇者計郗曇、王豐之、華茂、庾友、虞說、魏滂、謝懌、一作庾蘊、孫嗣、曹茂之、曹華、桓偉、王元之、王蘊之、王漁之、一十五人。詩不成，罰酒三巨觥者，計謝瑰、卞迪、丘髦、王獻之、羊模、孔熾、劉密、虞谷、勞夷、后綿、一作澤華者，謝滕、任儼、一作汪假、呂系、呂本、曹禮、一作禮。一十六人。——據桑世昌蘭亭考。

(十一) 先生年三十七，書黃庭經，書訖聞空中有語：「卿書感我，而況人乎，吾是天台丈人。」據羊欣筆陣圖。

(十二) 先生所書蘭亭叙，逾媚勁健，絕代所無。凡二十八行三百二十四字，字有重者，皆構別體，就中之字最多，乃有二十許個，轉變悉異。其時似有神助，醒後它日更書數十百本，皆不如先生亦自惜之，留付子孫，傳至七代孫智永，永是先生第五子徽之之後，故獨傳家法，其書付弟子辨才，太宗

聞之，令蕭翼計取入大內。太宗崩，遺命入昭陵，真迹遂亡。——據馮武書法正傳。

(十三) 先生少學衛夫人，書法將大能。及後渡江北遊名山，比見李斯曹喜等書，又之許。下見鍾繇梁浩書，又之洛下，見蔡邕石經，又之從兄洽處，見張昶華嶽碑，始知學衛夫人書徒費年月，遂改本師，仍於衆碑學習焉。遂成書。爾時年五十有三。

(十四) 先生入都，臨行題壁，子敬(獻之)密拭除之，輒書易其處，私爲不惡。及先生自都返，見曰：「吾去時真大醉也。」——據孫過庭書譜。

十 王羲之研究之參考資料

- 一、晉書列傳五十一王羲之傳
- 二、王右軍集(漢魏六翰百三家集)
- 三、清魯·同王羲之年譜(魯氏逸著刻本)
- 四、日本平凡社書道全集
- 五、世說新語

- 六、清湯球晉諸公別傳（叢書集成本）
- 七、唐張彥遠法書要錄
- 八、清馮武書法正傳
- 九、明張紳法書通釋
- 十、清馮班鈍吟書要
- 十一、宋桑世昌蘭亭考
- 十二、宋俞松蘭亭續考
- 十三、唐孫過庭書譜
- 十四、宋姜夔讀書譜
- 十五、宗白華論世說新語和晉人的美（時事新報二二六期（三十年四月廿八日）及二二七期（三十年五月五日））
- 十六、宋米芾海岳名言
- 十七、宋高宗翰墨志

十八、宋岳珂寶真齋法書贊

十九、清王澐淳化祕閣法帖考正

二十、常任俠王羲之蘭亭叙今傳各本概述（時事新報三十二年十二月五日第二五〇期學燈）

二十一、日本三省堂書苑二卷四號蘭亭號特輯

附錄

一 王羲之年譜

清魯一同遺著

丁卯晉懷帝永嘉元年 羲之生

本傳羲之卒年五十九。不審所卒何年。惟右軍集題衛夫人筆陣圖後。時年五十有三。永和十四年四月十三日書。溯當生於惠帝光熙元年丙寅。卒於哀帝興寧二年甲子。考永和盡於十二年。不當有十四年。決爲僞託。不足據證。筆陣圖云。之許見鍾繇梁鵠書。之洛見蔡邕石經書。時惟桓溫嘗一入洛。旋即敗退。逸少當無軍旅之任。不當無故游躡至洛。亦爲僞託之一證。羊欣筆陣圖。則云羲之年三十三書蘭亭敘。據此上推。當生於元帝太興四年辛巳。明年爲永昌元年。周顛已死。逸少裁及週歲。何得有十三歲謁顛之事。元敬親師太令。乃不悉其家世。其所差謬。至十餘年。斯可怪焉。至唐張懷瓘作書斷。始謂羲之升平五年卒。則當生於太安二年癸亥。東觀餘論。廣川書跋。皆用其說。然考本集有桓公以江州還臺帖。桓溫自江陵入朝。乃興寧

二年七月事。其移鎮姑孰。則在興寧三年二月。于是固讓內遙領揚州。故謂之還臺。升平以前未嘗有還臺事也。再考郗曇卒于升平五年。而郗愔傳載愔自曇卒益無處世意。在郡優游。與姊夫王羲之高士許詢俱棲心絕穀。修黃老之術。世說又載右軍與王敬仁許玄度並善。二人亡後。右軍爲議論更克孔巖誠之曰。明府昔與王許周旋有情。及逝沒之後。無慎終之好。民所不取。詳其年月。許後曇卒。王又後許優遊。盛於當年周旋。稱其疇昔進退相準。不當與重熙同年殂謝。又書斷載王洽升平三年卒。年四十三。王洽本傳升平二年卒。年三十六。王恬升平五年卒。年三十六。恬實洽兄。兄既後凋。年乃謝弟。凡此之類。牴牾甚明。何必右軍獨爲可據。相傳十七帖乃逸少與周益州。歷代鑒別。殆無異論。中一帖云。足下今年政七十耶。吾年垂耳順。推之人理。得爾以爲厚幸。益州名撫。鎮蜀二十年。按史稱三十年。考永和三年滅蜀。下至興寧三年。得二十年。則三十年未審。卒於興寧三年六月。據此則年垂耳順。正五十九歲。逸少之卒。又不得至興寧三年之後矣。故援證諸帖。推尋紀傳。斷以永嘉元年爲公生之歲。是年瑯琊王睿鎮建鄴。按右軍父曠爲淮南太守。元帝過江。曠首倡議。與諸王相隨南渡。推尋誓墓之文。夙違閔凶。不蒙過庭之訓。母兄鞠育。則曠當不究其年。

辰二年 一歲

巳三年 三歲

庚四年 四歲

辛五年 五歲

壬申 六歲

癸酉 愍帝建興元年 七歲始學書見筆勢傳是年懷帝見弒太子業即位于長安以琅琊王睿為左丞相

甲戌 二年 八歲

乙亥 三年 九歲

丙子 四年 十歲是年劉曜陷長安帝出降丞相睿移檄北征

丁丑 元帝建武元年 十一歲是年丞相即晉王位於建康

戊寅 太興元年 十二歲筆勢傳云羲之年十二見前代筆論于曠枕中竊而讀之曠曰汝何來吾所

教也羲之笑而不答其母曰汝年幼小看用筆法未能曉解縱獲父教恐復不能祕惜曠乃語羲之曰待汝成人吾當授汝羲之拜曰願早授之使得成人已為慕學曠語以大綱羲之學功日進又羲之年十二衛夫人一見語太常王策曰此小兒必見用筆訣也近觀其書便有老成之智因

流涕曰：此子必蔽吾書名矣。

卯二年 十三歲。本傳羲之幼訥于言，人未之奇。年十三，謁周顛，顛察而異之，時重牛心炙，坐容未暇，顛先割啗羲之，由是知名。

庚三年 十四歲

辛巳四年 十五歲

壬午永昌元年 十六歲。是年，徽、郗鑒爲領軍將軍，本傳太尉郗鑒使門生求女壻于導，導令就東廂。

徧觀子弟，門生歸謂鑒曰：「王氏諸少並佳，然聞信至，咸自矜持，惟一人在東床坦腹食，獨若不聞。」鑒曰：「此正佳壻耶。」訪之，乃羲之也，遂以女妻之。按鑒咸康四年始爲太尉，此乃追書之。

王氏譜曰：郗夫人名濬，字子房。是年王敦反，寇長沙，三月據石頭，殺戴淵，周顛帝崩，太子紹卽位。

王導輔政。

癸未明帝太寧元年 十七歲。是年王敦移屯姑孰，王導爲司徒。

本傳深爲從伯敦導所器重，時陳留阮裕有重名，爲敦主簿，敦嘗謂羲之曰：「汝是吾家佳子弟，當不減阮主簿。」裕亦目羲之與王承、王悅爲王氏三少。

甲二年 十八歲。是年敦復反。帝親征之。敦死。封郗鑒高平縣侯。

乙三年 十九歲。是年明帝崩。太子衍立。王導下壺。庾亮輔政。

丙成帝咸和元年 二十歲

亥二年 二十一歲。是年十一月蘇峻祖約兵反。

子三年 二十二歲。是年溫嶠陶侃討峻斬之。

丑四年 二十三歲

寅五年 二十四歲。是年陶侃鎮武昌。

卯六年 二十五歲

辰七年 二十六歲

巳八年 二十七歲

甲九年 二十八歲。是年陶侃卒。庾亮督江荆豫益梁雍六州諸軍事。進號征西將軍。鎮武昌。本傳

起家祕書郎。庾亮請為參軍。嘗以章草答庾亮。亮弟翼深加嘆服。因與書曰。『吾昔有伯英章草十紙。過江顛損。遂乃亡失。常嘆妙迹永絕。忽見足下。答家兄書。煥若神明。頓還舊觀。』按逸少為

祕書郎不知在何時。晉中興書羲之自會稽王友改授臨川太守。按此當在爲祕書郎之後。征西參軍之前。史不具。世說王修齡問王長史。我家臨川。何如君家宛陵。宛陵謂述也。按述傳。康帝爲驃騎將軍。召輔功曹。出爲宛陵令。再按康帝紀。咸和九年。拜散騎常侍。加驃騎將軍。正庚亮鎮武昌之歲。想逸少爲臨川亦其時也。

乙咸康元年 二十九歲

丙二年 三十歲

丁三年 三十一歲

戊四年 三十二歲。是年王導爲丞相。郗鑒爲太尉。庾亮爲司空。右軍集報殷浩書云。吾素自無

廊廟直王丞相時。果欲納吾。誓不許之。手跡猶存。由來尙矣。按本紀。是年六月。改司徒爲丞相。以太傅王導爲之。右軍書語。謂此時也。當琅琊渡江。賴王氏以立國。淮南首倡大謀。茂宏處仲。分筭內外。領軍衛軍侍中。中光祿。並居清要。宗族羣從二十餘人。參與朝列。逸少其時。裁作祕書郎。會稽王友。一守小郡。去參征幕。不樂廟朝。發于信誓。豈其棲心皓素。澹懷圭組哉。原王氏之盛也。遭遇江左。草創君臣。綱繆悉心委託。家門上下。並蒙殊寵。忠勤勳幹。固有可言。然而太陽至於降。

苟百僚議其私。敬雖深自謙抑。而有識固已懼矣。永昌犯順。訟導爲詞。導之忠款。中外共亮。然而
舛肇於刁劉。禍延於周戴。推原心跡。渠無介介。平南逸少叔父。忠雅素稱。譙王之死。親承逆指。比
于錢沈。有何殊異。凡自舉動。豈逸少之所趨哉。曩令于湖遂其悖節。京師盡其兵勢。天下且以導
虞爲能。張膽不無賴而生乎。屬金行未燿。凶讎再夷。成彼周召之勳。無負顧託之重。而門戶之見
缺。缺未除。元規作鎮。內不能平。幾遭嫌舛。蓋孔明之論。君子未仁。積微成章。積章成鉅。微卻啓于
障扇。鉅釁成乎始鳩。將史宮府爲之乖異。賢戚恩而喪心。逸少慨然遠鑒。託誠征府。遠強盛之勢。
銷形跡之嫌。內明素正之懷。外藉調和之美。可謂志貞淵識。矚然獨邁者也。觀彼誓墓之文。仰詠
老氏周任之誠。常恐斯亡無日。憂及宗室。亦足明念亂之本。懷識處窮之大節。而世不察。謂志在
名山滄濟。是猶求焦明于藪澤。喻義曜于槃爨。烏足測其標舉。睹其光潔者哉。世說庾太尉在武
昌。秋夜氣佳景清。使吏殷浩王胡之之徒登南樓。理詠音調。始適聞函道中有屐聲甚厲。定是庾
公。俄而率左右十許人步來。諸賢欲起避之。公徐曰。諸君少住。老子於此處興復不淺。因便據
胡床。與諸人詠。譙竟坐得任樂。後王逸少與丞相言及此時。丞相曰。元規爾時風範。不得不小頽。
逸少容曰。「惟壑邱獨存。」

癸巳五年 三十三歲。是年七月，王導卒。八月，郗鑒卒。以庾冰爲揚州刺史，督揚豫兗三州軍事。冰辟

謝安下郡縣，敦逼赴召，月餘告歸。謝安傳嘗與羲之共登冶誠，伯心然遐想，有高士之志。羲之曰：

「夏禹胼胝，文王旰食，今四郊多壘，宜思自效，而虛談廢務，浮文妨要，恐非當今所宜。」按史載于安

爲尙書僕射後，時羲之已歿，故當在此年也。

庚子六年 三十四歲。是年正月，庾亮卒。本傳：參庾亮軍，累遷長史。亮臨終，上疏稱羲之清貴有裁鑒，

遷寧遠將軍、江州刺史。

辛丑七年 三十五歲。有敬倫帖。按王劭字敬倫，導第五子，歷東陽太守、吏部郎、司徒左長史、丹揚尹。

遷吏部尙書、尙書左僕射，領中鎮軍，出爲建威將軍、吳國內史。帖云：「九月三日，羲之報敬倫，遮

諸人去晦祥禪，情以酸割，念卿傷切，諸人豈可堪處。」按去晦者，八月晦也。導以五年七月庚申

薨，再期大祥，逾月而禪，故以七年八月晦日禪也。遮當是小字，導六子悅、恬、洽、劭、蒼，次遮於敬

倫，遮豈蒼耶？又有遮何日西帖，又一帖：「庚雖疾篤，謂必得治力，豈圖凶問奄至，痛婉情深，半年

之中，禍毒至此，尋念相摧，不能已已。況弟清當作情，何可任遮等荼毒殆一作備，盡當可忍視言之酸心。

奈何奈何！」按庚元規以六年正月薨，距茂宏道徽之歿，相去半年。茂宏逸少從伯，國之宗祏，道

徽婦翁元規府主並有知己之感故其辭氣淒酸如此蒼爲茂宏幼子遮荼毒備盡當謂是矣。劉

標新語注：蒼別字小奴，似不當再字遮，然王珣小字法護，亦字阿孤，此之兩字，何不可邪？此帖當係六年，以類附於此。

壬寅八年 三十六歲是年帝崩琅琊王岳即位。

癸卯康帝建元元年 三十七歲是年詔議經略中原庾翼移鎮襄陽有一昨得安西帖稚恭遂進鎮

帖按翼鎮荊州以石虎衰暴婁表北伐康帝及朝士皆遣使譬止帖云「一昨得安西六日書無他所知說故不復付送讓都督表亦復常言耳」則逸少所見之表卽論北伐事稚恭此舉朝論異同故逸少亦謂常言及聞其遷襄陽乃言稚恭遂進鎮東西齊舉想剋定有期則始同羣議而終以爲當然矣翼常遣使東至遼東西到涼州要結二方欲同大舉慕容張駿並請師期觀其廣農蓄穀綏來招納之宜陳甲變弧經略深遠之致若天假之年奮其絕足乘石羯之內亂屬兩隅之風向必當汎掃園陵廓清河朔豈與夫殷淵源謝豫州同日語哉逸少遠識洞鑒于殷謝勲勳誠諫而深注安西期以剋定抑有繇已。

月二年 三十八歲獻之生。劉孝標世說新語注：獻之以太元十三年卒年四十五書斷及東觀餘論云：獻之太元十一年卒年四十三皆當生於此年。按法書要錄有

與郗家論婚書上云「敢致書司空高平郗公足下子敬少有清譽云云」子敬生時距司空歿

已六年其爲僞託居然可見且書中稱謂乖錯脫謬前人了無糾正斯爲疏矣。世說：郗司空在北府，桓宣武惡其居兵權，謂郗方罔也。或據此謂論婚書所云：司空當指愔。正作黃門侍郎。臨海太守耳。是年以謝尚爲西中郎將督揚州之六郡諸軍事豫州刺史假節鎮歷陽秋帝崩太子聃卽位。

乙巳 穆帝永和元年 三十九歲。是年詔會稽王昱錄尚書六條事。庾翼卒。以徐州刺史桓溫爲安西將軍都督荆司雍益梁寧六州諸軍事。領南校尉。荊州刺史。

丙午 二年 四十歲。是年以左光祿大夫蔡謨領司徒錄尚書六條事與會稽王昱輔政。三月以前司徒左長史殷浩爲建武將軍揚州刺史。本傳：羲之既少有美譽。朝廷公卿皆愛其才器。頻召爲侍郎。吏部尚書皆不就。後授護國將軍。又推遷不拜。揚州刺史殷浩素雅重之。乃遺書曰：悠悠者以足下出處足觀政之隆替。如吾等亦謂爲然。至如足下出處正與隆替對。豈可以一世之存亡必從足下從容之適。羲之報書略云：若蒙驅使。關隴巴蜀皆所不辭。吾雖無專對之能。直謹守時命。宣國家威德。故當不同于凡使。必令遠近咸知。朝廷留心于無外。此所益殊不同。居護軍也。漢末使太傅馬日磾慰撫關東。若不以吾輕微。無所爲疑。宜及初冬以行。吾惟恭以待命。卒用爲護軍。逸少志存仇敵。羲之在折衝向平。婚嫁之志。故是有託而逃。而朝廷投之散職。近是違材易務。

矣。苦求外出，不數年而棄郡優游東土，豈其心乎？是年十一月，桓溫卒，征虜將軍周撫等伐蜀，帖云：「十四日諸問如昨，云西有伐蜀意，復是大事，速送袍來。」

未丁三年

四十一歲。是年桓溫克成都，以周撫督梁州諸軍事，遷平西將軍益州刺史。按右軍十七

帖，黃伯思以爲皆與周益州書。楊慎《四川總志》載十七、卅竹，諸葛譙周、山川諸奇、講堂、嚴君平、鹽井八帖，爲與周益州。其旗幟、胡桃帖，亦似與益州也。撫名父之子，而爲王氏私人。咸和初，王導又嘗以撫爲從事中郎，又從溫、嶠討平蘇峻。咸和四年，遷監河北軍事，鎮襄陽。明年，石勒將郭敬率騎攻撫，撫不能守，率所領奔于武昌，坐免官。尋遷建威將軍，豫章太守。後代毋邛與監巴東諸軍事，益州刺史。尋進征虜將軍，加督寧州諸軍事。永和初，從溫伐蜀。帖云：「十七日先書，郗司馬未去，卽日得足下書爲慰。」郗司馬者，謂郗曇。簡文帝以咸康六年進撫軍將軍，引曇爲司馬。此帖雖與益州，乃在未入蜀之前。若撫旣入蜀，曇不復爲撫軍司馬，且曇不得至蜀，與書意未合也。一帖云：「見諸葛顯，曾具問蜀中事。」按草法，或云是顯。然考蜀志，諸葛顯、顯父攀、攀父喬、喬遠、次子也。華陽國志云：「平蜀之明年，移蜀大臣宗預、廖化、諸葛顯等，于東下。至元帝建武元年，蓋五十四年。」右軍故及見之。此用安吳包氏說，惟包氏以平蜀明年至建武元年爲五十二年誤。一帖云：「朱處仁今所在，往得其書信，遂不

取答。是時有龍驤將軍朱壽與撫同平益州處仁當其字也。一帖云「多分張念足下懸情，武昌諸子亦多遠官，足下兼懷。」按咸和五年陶侃鎮武昌，撫奔武昌，侃方在鎮，其遷建威監巴東刺益州，正當二庾相繼作鎮時，逸少以咸和九年參庾亮軍事，遷長史，時必與撫周旋，以謂武昌諸子，蓋征西幕中若殷淵、源、庾稚恭、王修齡、范玄平之徒，又孟嘉亦嘗在庾武昌幕，孫盛嘗爲庾公記室，參軍爾時南樓嘯詠，才俊如林。安吳包氏十七帖疏證：武昌謂陶士行十七子，九子舊史有名，撫妹士行子婦也，故云兼懷，亦存一說。又亮子蘇，字道季，好學有文章，十五嘗以書諫庾翼，翼甚奇之。升平中代孔嚴爲丹楊尹，帖中所謂庾丹楊也。

申戊 四年 四十二歲。是年以謝尙爲安西將軍，加桓溫征西大將軍，十二月寫樂毅論，按通鑑以逸

少爲護軍，在此年。

酉己 五年 四十三歲。是年四月石虎死，子世嗣，五月石遵廢世而自立，朝廷欲綏輯河洛，以王胡之爲西中郎將，司州刺史，胡之字修齡，故有風眩疾，固辭未行而卒，有司州供給寥落帖，太常司州領軍諸人帖，帖云「司州供給寥落去無期也，不果者公私之望無理，或復云是福云云。」是年六月桓溫屯安陸，遣諸將討河北，七月褚裒進彭城，遣部將王龜、李邁及石遵將李農戰於代陂，王師敗績，此云或復是福，若先見矣，又一帖云「適太常司州領或作鎮軍諸人廿五六書皆佳，司州

以爲平復。此慶慶可言。餘親親皆佳。大奴比還吳也。冀或見之。按王彪之傳。遷尙書僕射。不拜。徙太常領崇德衛尉。王洽字敬和。導諸子中最知名。弱冠。歷散騎中書郎。中軍長史。司徒左長史。建武將軍。徵拜領軍。奮字敬文。除吏部郎侍中。建威將軍。吳國內史。徵補領軍。不拜。徙尙書領中護軍。復爲征虜將軍。吳國內史。轉督浙江東五郡左將軍。會稽內史。進號鎮軍將軍。據此諸傳。則太常爲彪之。司州爲胡之。領軍爲洽。王劭亦嘗爲鎮中領軍。鎮軍則奮。又世說王敬倫風姿似父。作侍中。加授桓公。公服從大門入。桓公望之曰。大奴固自有鳳毛。大奴。劭小字也。又一帖云。諸從並數有問。粗平安。惟修載在遠。音問不數懸情。司州疾篤。不果西。公私可恨。足下所云。皆盡事勢。吾無間然云云。按此帖舊亦以爲與周益州修載名者之。王廙之子。胡之之弟。爲鄱陽太守。故云在遠。此與司州供給帖爲一時事矣。是年以荀羨爲使。持節監徐兗二州諸軍事。北中郎將。徐州刺史。

庚

六年

四十四歲。是年正月。加中軍將軍。殷浩督揚豫徐兗青五州軍事。假節。十二月。免蔡謨爲

庶人。

辛

七年

四十五歲。自護軍出爲右軍將軍。會稽內史有辭郡帖。恭命帖。殊遇帖。及會稽帖。此郡帖

凡在郡論事諸帖。

如上虞縣事。諸暨餘姚。諸帖皆是。

皆在後四年中。但不可殊晰耳。本傳爲會稽不答何年。按王

述傳。出補臨海太守。遷建威將軍。會稽內史。母憂去職。服闋。代殷浩為揚州刺史。穆帝紀。永和十年二月。廢揚州刺史殷浩為庶人。以前會稽內史王述為揚州刺史。據此上推。則述之居憂去職。當在今年。逸少代述。故知為會稽內史。在此年也。

壬八年 四十六歲。是年三月。使北中郎將荀羨鎮淮陰。據帝紀。按羨傳。鎮淮陰。下邳。在免蔡謖之先。當穆前二年。四月。安西將軍謝尚師姚襄。與張遇戰于許昌之誠橋。王師敗績。八月。中軍將軍殷浩帥衆北伐。次泗口。有諫

殷浩北伐書。此書子集未載。殷侯帖。

丑癸九年 四十七歲。是年三月三日。與太原孫統等四十一人修禊於山陰之亭。蘭揮豪製序與樂

而書。用蠶繭紙。鼠須筆。凡二十八行。三百二十四字。同時會者司徒陳郡謝安。司徒當作琅琊王友。司徒左

西屬陳郡謝萬。左司馬太原孫綽。行參軍徐豐之。前餘姚令太原孫統。王凝之。王宿之。廣漢王彬

之。王徽之。陳郡袁嶠之。以上並羲之十一人。各成四言五言詩一首。散騎常侍高平郗曇。前參軍王豐之。前上虞令華茂。穎

川庾友。鎮軍司馬虞說。郡功曹魏滂。郡五官佐謝憚。一作穎川庾蘊。前中軍參軍孫嗣。行參軍曹

茂之。徐州西平曹華。一作曹華平。滎陽桓偉。王元之。太原王蘊之。王渙之。以上十五人。一篇成。侍郎謝瑰。鎮國大

將軍掾卞迪。行參軍事印邱髦。王獻之。行將軍羊模。參軍孔熾。參軍劉密。山陰令虞谷。府功曹勞

夷府主簿后綿一作汪前長岑令華者前餘姚令謝勝府主簿任儼一作汪任城呂系任城呂本彭城

曹禮一作禮以上十六人詩不成謂酒三巨觥接何延宋桑世昌蘭亭攷引李兼一條云「羊欣筆

陣圖云羲之年三十二書蘭亭敘王師乾右軍祠堂碑云右軍自內史後峻嘗墳塋捐葉龜組曲

水蘭亭自為之序黃長睿東觀餘論云永和十年右軍年三十八時已去會稽郡矣所記右軍出

處年歲皆不同晉書傳云羲之初渡浙江有終焉之志會稽佳山水名士多居之嘗與同志讌在

山陰之蘭亭為之敘以申其志信如列傳則蘭亭之遊乃右軍隱居時也按通鑑云永和四年

浩以江州刺史王羲之為護軍八年羲之遺殷浩書諫北伐十年以前會稽太守當作內王述為

揚州刺史十一年三月羲之稱疾去郡以此推之永和九年其時為會稽內史無可疑者晉書

脫略羊欣王師乾所記皆舛黃長睿號該洽嘗跋右軍破羌帖云永和十二年去會稽郡已歲餘

此語良是至東觀餘論則自相牴牾有不可解右軍生于惠帝太安二年癸亥歿于穆帝五年

酉蘭亭之遊時年正五十有一云云一同按李氏此論亦仍舊說與書斷書跋皆同辨已見前

至謂黃氏自相牴牾則東觀餘論無永和十年右軍三十八歲之語循究晉書亦未嘗指蘭亭為

右軍隱居時事且謂右軍卒于穆帝五年穆帝下脫升平二字嫌是永和疏脫甚矣恐當誤後

故附辨於此。書苑精華載：白雲先生筆談：未嘗有永和九年三月六日右將軍王羲之記。按羲之爲是年四月右軍將軍。非右將軍。晉有左右前後四軍將軍。四軍將軍品高。此記恐未足據。

以安西將軍謝尚爲尚書僕射。有與尚書僕射謝尚書。本傳羲之之爲會稽。時東土饑荒。輒開倉振貸。朝廷賦役繁重。吳會尤甚。羲之每上書爭之。事多見從。又遣尚書僕射謝安書云云。按逸少去會稽。在永和十一年三月。此時謝安尚在東山。安爲僕射。在孝武之初。何得逸少尚存。正爲謝尚。固無疑焉。十月。中軍將軍殷浩進次山桑。使平北將軍姚襄爲先鋒。襄叛。反擊浩。浩退保譙城。十一月。浩使劉啓。王彬之。討襄。復爲襄所敗。有與會稽王牋。陳殷浩不宜北伐。又與殷浩書。諫再舉北伐事。二書見本傳。又帖云：「得孔彭祖十七日具問爲慰。」孔彭祖名巖。時爲殷浩揚州別駕。云襄經還蠡。是反善之誠也。于殷必得速還。無復道路之憂。」又云：「得豫章書爲慰。想以具問。昨得都十七日書。賊徑還蠡臺。不攻譙。是其反善之誠也。想殷生得過此者。猶令人憂。期諸處分猶未定。羊將軍旦夕至也。」按晉書載。記姚弋仲以永和七年遣使請降。八年卒。子襄南奔晉處。襄於譙城遣五弟爲任。單騎渡淮。見豫州刺史謝尚於壽春。尚去仗衛幅巾以待之。一面交歡。使若平生。襄少有高名。雄武冠世。好學博通。雅善談論。殷浩憚其威名。乃囚襄諸弟。頻遣刺客殺襄。客皆推誠告實。浩潛遣將軍魏憬襲襄。襄斬憬而并其衆。浩惡之。乃使將軍劉啓守譙。遷襄于梁國蠡臺。復遣謝萬討襄。

襄逆擊破之。會聞關中有變，浩率衆北伐。襄乃要浩于山桑，大敗之。浩遣劉啓、王彬之伐山桑，襄擊滅之。鼓行濟淮，屯于盱眙，遣使建鄴，罪狀殷浩並自陳謝。據此，襄之背叛，乃浩激成之。浩力小任重，駕馭乖方，逸少深所嘆惋。至於再四，其與會稽箋略云：「願殿下更垂三思，解而更張，令殷浩苟羨，遠據合肥、廣陵、許昌、譙郡、梁、彭城諸軍皆還，保淮爲不可勝之基，須根立勢舉，謀之未晚。」與殷書云：「今軍破於外，資竭於內，保淮之志，非復所及。莫過還保長江，都將督各復舊鎮，自長江以外，羈縻而已。」又云：「若猶以前事爲未工，故復求之于分外，宇宙雖廣，自容何所？」反復開譬，可謂極拳拳之忠謀。而當時朝論，務求度外之功，以抗拒上游，連年喪敗，公私騷騷，卒使權臣得所藉口，東陽放蕩，事不由中。太阿假于雄藩，強枝披其弱幹，江左不振，職此之由。曩令簡文納其嘉謨，淵源指其忿介，將相和同，無生嫌衅，溫雖雄很，未有窺覷之漸也。石氏內亂，羌姚輸誠，興復之機，無逾此日。誠如逸少本謀，先固根本，因循所長，然後撫輯士衆，招揖河洛，連綴關輔，縱不百勝，規撫所及，或未易量。卽萬萬不然，亦未至離披若斯之甚也。彼其言曰：「今雖有可欣之會，內求諸己，而所憂乃重于所欣，自非聖人外寧，必有內憂，揆厥深衷，此語當桓氏矣。咸康之始，釁生王庾，永和之世，憂在殷桓，小國多門，斯亡無日，懋勳彌縫，冀隆大業，渡江名賢，識此蓋鮮，安

石少宏雅量，遂隆孝武之業，而洞達斯同，勤實猶遊，率斯以說，逸少卓犖偉抱，政當于壯士求之，未知于叔子輩何如耳。過江以還，所未有也。又有郡荒帖、斷酒帖、增運帖、增運帖略云：吾于時地甚卑疏，致言誠不易，然以在大臣之末要，爲居時任，豈可坐視危難，今更極言于相並，與殷謝書皆封示卿，勿廣宣之于人，皆謂盡當今事，宜直恐不能行耳。謂會稽王殷謝書，卽前書矣。

實甲
十年

四十八歲。是年二月，桓溫帥師伐關中，廢殷浩爲庶人。以前會稽內史王述爲揚州刺史。

有與孔彭祖帖云：「殷廢責事，便行也。嘆恨無已。」蓋浩廢後致孔，嘆吾謀不用，卒致僨蹶。四月，桓溫及苻健于萇戰于藍田，大敗之。六月，苻健將苻雄、悉衆及溫戰于白鹿原，王師敗績。九月，糧盡引還。有渭南帖，方軌帖。按二帖似與桓公帖云：「二十二日發至長安之渭南，患無他，然云苻健衆尙七萬，苟及最近，雖衆由匹夫耳，卽今尅此一段，不知歲終云何，守之想勝自有方耳。」又云：「賊勢可見，此云方軌萬萬如志，但守之尙足，令智者勞心，此回書恆懷湯火處事不易，豈惟公道。前書計當藍田克捷之先，言賊衆不足畏，但克終爲難。後書白鹿原敗喪之先，方軌如志不足喜，但使賊守險不戰，尙足使智者勞心。」推尋事理，良由糧運不繼，利在速戰，不利持久，此之料事，亦云奇中，元規賞其裁鑒，豈虛語也。

卯十一年

四十九歲

三月稱病去郡

有祭墓文與吏部郎謝萬書

按謝萬傳未嘗爲吏部郎史不具

羊參軍帖帖

云「今又告誠先靈以文示足下感懷慟心」蓋指誓墓文也本傳時驥騎將軍王述與羲之齊

名而羲之甚輕之由是情好不協述先爲會稽以母喪居郡境羲之代述止一弔遂不重詣述每

聞角聲謂羲之當候已輒洒掃待之如是累年而竟不顧深以爲恨及爲揚州刺史將就徵周行

郡界而不過羲之臨發一別而去先是羲之嘗謂賓友曰懷祖正當作尙書耳投老可得僕射再

求會稽便自邈然及述蒙顯授羲之恥爲之下遣使詣朝廷求分會稽爲越州行人失辭大爲時

賢所笑既曰內懷媿嘆謂其諸子曰吾不減懷祖而位遇懸邈當由汝等不及坦之故耶述後檢

察會稽郡辨其刑政主者疲於簡對羲之深恥之遂稱病去郡于父母墓前自誓按此蓋前史之

隱竊推心迹以爲不然逸少清夷宏粹澹於榮利何獨懷祖不能相容橫生嫌衅觀其本集有與

王會稽借人書嘗時懷祖外惟彪之敬文嘗爲會稽乃其羣從兄弟不當云王會稽明爲懷祖審

矣又一帖云「懷祖可呼賀祭酒俱」似與懷祖有所要約何云頓絕周旋哉當與殷桓水火移

書苦諫欲畫廉藺於屏風往事幾何不當明於責人懷祖雖頗傷躁急既躋重位深用柔克無奕

憤詬面壁終日又何與逸少獨介介也且逸少以超世邁往之姿值始興當國以家門過盛深懷

憤詬面壁終日又何與逸少獨介介也且逸少以超世邁往之姿值始興當國以家門過盛深懷

沉默淵源枋用。舉爲護軍。始迴尙平之志。欲馳驅關隴巴蜀。宣國威于無外。此之未展。乃苦求小郡。回翔而已。會稽之授。舍逸就勞。固已非其本志。曩令少改從容之適。奮其才譽。藉文獻之門伐。倚高平之葭李。出征西之塵幕。赴機蹈會。不出數年。可以超總大藩。入參機要。乃以投老之年。與藍田區區計較榮位。遷怒燕翼。取笑時賢。爲世林婆娑之事乎。原其解組。志非一朝。中興以來。處內外之任者。非驕悍陸梁。則虛廢迂遠。罔有深謀大度。而疲竭根本。欲以一隅。經緯天下。既上游代。有強輸朝廷。軍食專倚。東南賦役繁重。饑荒相仍。觀其與仁祖陳說。逋滯振荒。斷酒崇務。寬約因循。更始爲不可拔之計。雖時獲允納。猶十一不舉。懷祖繼以嚴峻苛察之政。檢對煩複。文符披猖。而事已屈於當權。不能俯順。同異重傷。本懷茲所以深用嘆悔。決不能終日者也。且其言曰。若風教可宏。令忠著于上。義行于下。雖古之逸士。亦將眷然。觀頌舉厝君子之道。蓋矣。推原乃心。可謂明白審矣。夫載筆纂言。非識閎濶。亭嘯詠。風流千載。乃謂逸少自媿季倫。陋識謊言。莫斯爲甚。至如王濟癡叔。時望歸之。公輔懷祖。躁急初譽。亦云沈靜。載記之體。蓋如斯乎。是年進豫州刺史。謝尙督并冀幽三州諸軍事。鎮西將軍。鎮馬頭。

丙辰 十二年 五十七歲 是年三月 姚襄入於許昌 以桓溫爲征討大都督 以討之 溫及襄戰於伊水大

敗之。襄走平陽，使毛穆之等鎮洛陽。十月，慕容恪攻段龕於廣固，荀羨救之。有羌賊故在許下，帖九日帖破羌帖，伏想清和帖。荀侯帖，羌賊帖云：「昨日得無奔阿萬，此月二日書甚近清和耳。羌賊故在許下，自當了也。桓公未有行，曰阿萬定缺吳興。」按此帖當在是年三月，桓溫受命征討之後，無奔謂謝奕。時爲溫司馬，阿萬謂謝萬。時爲吳興太守。九日帖者，是年九月九日也。時溫已破襄，而書云久當至洛，告捷尙未至當陽。去月九日書者，溫自江陵北伐，路出當陽，運遲可憂者。按溫北伐者，三白鹿原之場，以軍糧不屬而退枋頭之戰，以軍糧竭盡而敗。惟伊水之戰，僅而獲濟，入洛之後，不能久留，當亦糧運不繼故也。蔡公者，蔡謨也。謨遷司徒，不拜，忤旨廢。永和十二年卒。正當此時，史不箸卒月，當在秋冬之際。仁祖當委篤者，溫平洛陽，疏請謝尙爲都督，司州諸軍事，將鎮洛陽，病不行。破羌帖，王略始及舊都，及仁祖小差云云。正一時事。清和帖，桓公十月末書爲慰云，所在荒甚可憂。又在破羌帖後，殷生數問北事勢，謂浩也。想安西以至能數面不，或云頓歷陽爾耶。張氏溥以安西爲庾稚恭，竊謂安西六日書爲庾安西，此乃謝安西也。智者稚恭爲安西將軍，時溫方爲徐州刺史，名望未著，與書中稱桓公不合。翼鎮襄陽，溫雖贊成其計，未嘗相從共事。又翼未嘗鎮歷陽，故知非庾安西也。尙始以西中郎將豫州刺史鎮歷陽，溫欲有事中原，使

尙率衆向壽春進達安西。永和中。拜尙書僕射。出督江西淮南諸軍事。鎮歷陽。如故。進達鎮西。鎮壽陽。溫平洛陽。請督司州將鎮洛陽。以疾病不行。升平初。卒於歷陽。與此帖事正合。荀侯帖。遠近清和。士人平安。荀侯定住下邳。復遣軍下城。此間民事。智愚長嘆。乃亦無所隱云云。按荀羨初鎮下邳。在永和六年。逸少未至會稽之先。至十二年救段龔。不及復還下邳。定住云者。遙度未必之詞。此間民事。此會稽也。又有荀侯佳不帖。又得謝范六日書帖。虞義興帖。二帖皆言敗姚襄事。還鎮帖。官舍帖。中夏感懷帖。皆言謝仁祖事。又運民帖。卽前所云運遲可憂也。按升平三年三月甲辰。詔以比年出軍糧運不繼。王公以下十三戶借一人。一年助運。所謂運民。正當如此。時逸少已去會稽。而拳拳軍國。益信去都非如論者云云矣。是年五月寫畫像讚。及黃庭經。黃伯思東觀餘論云。世傳黃庭真帖。爲逸少書僕嘗攷之。非也。陶隱居真誥翼真檢論戰清真經始末云。晉哀帝興寧二年。南嶽夫人所授子弟司徒公府長史楊君使作隸字寫出。以傳護軍長史許君及子。上計掾掾。以付子黃民。民人以傳孔默。後爲王興先竊寫之。始降浙江。遇風飄淪。惟有黃庭一篇得存。蓋此經也。逸少以穆帝升平年卒。是年歲在辛酉。此仍張氏舊說後三年卽興寧二年。始降黃庭於世。安得逸少豫書之。又梁虞蘇論書表。及晉書本傳。著道士贈鵝事。皆云道德經。未嘗言黃庭也。然

陶隱居與梁武帝啓云。逸少有名之蹟。不過數首。黃庭勸進告誓等。不審猶有存否。蓋此啓在著真誥前。未之考耳。至唐張懷瓘作書估云。樂毅黃庭。但得幾篇。卽爲國寶。遂誤以爲逸少書云云。廣川書跋。羲之自寫黃庭。授子敬。不爲道士書。又云開元中。陸元佛奉詔檢校。言右軍眞行惟有黃庭告誓。知非楷字矣。天寶末。爲張通儒盜去。莫知所在。乃知舊書不傳。今所見者。特後世重揚墨摹。不得其眞。按此又。王氏法書苑駁之云。伯思之論。似若詳悉。以予考之。書黃庭經換鵝。與道德經換鵝。自是兩事。伯思謂黃庭之傳。在右軍死後。此最失於詳審也。道家有黃庭內景經。黃庭外景經。及黃庭遁甲緣身經。黃庭玉軸經。世俗例稱爲黃庭經。內景經。乃大道玉晨君所作。扶桑大帝君命賜谷神王。傳魏夫人。凡三十六章。卽真誥所言者。外景經三篇。乃老君所作。卽右軍所書者。與魏夫人所傳初不同。右軍所書外景經。石刻一卷。凡六十行。末云。永和十二年。黃庭亦作十二年。今五月二十五日。在山陰縣寫。與歐陽集古錄目校之。與文忠所藏本同。則右軍之寫黃庭。甚曉然。伯思謂與梁武啓。在著真誥之前。此又曲爲之辨也。予嘗於道藏中得務成子注外景經一卷。有序云。晉有道士好黃庭之術。意專書寫。聞王右軍精於草隸。而復愛鵝。遂以數頭贈之。得其妙翰。張君所進雲笈七籤。亦載此序。此最爲的據也。云云。王氏綺李太白詩注曰。按王羲之嘗見山陰道士有羣鵝。求之。乃邀右軍書黃庭經以換。太平御覽引何法盛晉中興書曰。山陰有道士養羣鵝。羲

之意甚悅。道士云爲寫黃庭經，當舉羣相贈。仙傳拾遺：山陰道士管霄，龍鶴一雙，遺羲之，請書黃庭經，卽謂仙傳拾遺或出於僞選。白氏所引又不著本自何書。然太平御覽所引晉書中興書，則晉史之先鞭也，豈不足信乎？一同按：右軍黃庭，梁陳以來更無異論。伯思首滋疑議，鳳洲駁之，瑒崖之辨，詳哉允矣。且如褚遂良、徐浩、韋述之流，皆妙精鑒別，親直祕府，曝書之夕，並睹真蹟，簡記燦然，隱居啓事，始謂黃庭告誓，不審猶有存否。後一啓卻云：垂旨以黃庭像讀等諸文，可更有出給理，前猶疑似之詞，後則較然審矣。當時年代匪遠，內府寶惜，等子球圖，梁武精鑒好文，黃庭最其烜赫，必無僞謬者焉。

丁卯升平元年

五十一歲。是年五月，謝尚卒，以謝奕爲使持節、都督兗豫冀并四州軍事、安西將軍。

豫州刺史。七月，苻堅將張平以并州降，遂爲并州刺史。十二月，以太常王彪之爲尚書左僕射，有

旦夕都邑動靜帖。帖云：「州將桓公者。」按桓溫傳：選尚南康公主，襲爵萬寧男，除瑯琊太守，遷

徐州刺史。逸少瑯琊人，故稱桓爲州將。舊以其時州將爲句殊未終。無奕外任，數書問無他者。按謝奕傳：從兄

尚，有德政，旣卒，爲西藩所思，朝議以奕立行有素，必能嗣尚，乃遷都督豫兗冀并四州軍事。正謂

此時，仁祖日往。本集作日，任非。言尋悲酸者。時仁祖卒已逾月。舊以此爲與周益州書，亦無可證據。又一帖：君頃復何以辭

懷。鐵云秋當解褐。行復分張。想君比爾。快爲樂。彥仁書云。仁祖家欲至蕪湖。單弱令傳。何所成。君書得。載停郡迎喪。甚事宜。但異域之乖。素已不可言。何時可得發。鐵者。安石之弟。爲永嘉太守。故云解褐。仁祖卒于歷陽。此言喪柩。欲至蕪湖也。太常帖云。太常故患脚灸。俞體中可耳。僕射事已行。以表讓。未知恕不。此正指彪之由太常爲僕射。是年慕容儁徙都鄴。帖云。義興何似懸情。慕容遂來據鄴。可深憂。當此時也。

戊午二年

五十二歲。是年三月。慕容儁陷冀州諸郡。詔安西將軍謝奕。北中郎將荀羨。北伐。六月。并

州刺史張平爲苻堅所逼。帥衆三千奔于平陽。堅追敗之。八月。謝奕卒。以吳興太守謝萬爲西中郎將。持節監司豫兗冀并四州諸軍事。豫州刺史以散騎常侍郗曇爲北中郎將。持節都督徐兗青冀幽五州軍事。徐兗二州刺史。十二月。北中郎將荀羨及慕容儁戰于山莊。敗績。有與桓公牋。誠謝萬書。按本傳。萬受任北征。矜豪傲物。嘗以嘯詠自高。未嘗撫衆。兄安深憂之。自隊主將帥以下。安無不慰勉。謂萬曰。汝爲元帥。諸將宜數接對。以悅其心。豈有傲誕若斯。而能濟事也。萬不能從。以至潰散。萬雖才器雋秀。早獲時名。而綜物應務。非其所堪。逸少致賤。宣武謂是達才易務。其誠萬曰。願君與士之下者同甘。則盡善矣。食不二味。居不重席。此復何有。而古人以爲美談。濟否

所由實在積小以致高大。旨哉言乎！古人命將應敵，觀其辭氣舉動，便知可濟。進止尺寸之間，儲材竹木之細。昔桓公以竹馬而鄙淵源，郝超以履屐而知級度。豈有居總統之位，當一面之寄，而邁往不屑，欲以矜簡之韻，驅策郡流，欲無狼狽，胡可幸也。世說：萬自壽春敗後，與右軍書，慚負宿願。右軍答曰：此禹湯之戒，昔以虛談戒安。今以積小規萬，逸少之於二謝，可謂苦口利病。用與不用，便爲優劣者也。又一帖：適重熙書如此，果爾，乃甚可愛。張平不立勢，向河南者，不知諸侯何以當之。熙表故未出，不說說，荀足下，故爾堪行，想不成病耳。吾至無賴，行剋，候疾，患想當轉佳耳。若熙自勉此一役，當可言。淺見實不見。今時兵任，可處理。當在此時，而本集失載。按張平本石氏并州刺史，降苻堅爲大將軍，冀州牧。去年降晉，據新興、雁門、西河、太原，上黨，夏十餘萬戶。并游征鎮，欲與燕秦爲敵國。已而後降秦，降燕，蓋反梟桀。此云不立勢，向河南者，恐其侵軼。再按郝曇傳：荀羨有疾，朝廷以曇爲羨軍司。羨徵還，始除北中郎將、都督刺史。荀羨傳：以疾篤解職後，降右軍將軍，加散騎常侍，讓不拜。升平二年卒。時年三十八。據此，則羨旣疾篤，始蒙徵還，而以軍任授曇。曇旣總統，羨豈在軍，而本紀于升平二年十二月有北中郎將荀羨及慕容雋戰于山茌一事。此時羨當綿憊，且久去軍中，本紀爲不核矣。帖中荀足下，故爾堪行，想不成病，正是指羨疾。

篇徵還讓職不拜事豈有歲終月窮方與雋將賈豎決戰之理當據以正本紀之誤通鑑注引燕書及載記亦

以出山從之司職在升平二年十二月而疑八月參爲軍司未爲刺史然惟燕書此事于十二月而載記固未繫月也又漢傳卒後帝聞之歎曰奇令則王敬和相繼凋落股肱腹心將復誰寄敬和亦二年卒則

漢卒之年無可疑者疾篤解職後始除右軍望文生義因非旬月間事也是年出王彪之爲會稽內史有向得萬書帖賢室委頓帖帖

云向亦得萬書委曲備悉使人慨然見足下乃悉叔虎剋昨發半月賂略必至未見勞參軍知賢

室委頓何以便爾甚助耿耿念勞心知廿四日亦得叔虎廿二日書云新年乃得發云云按晉書

彪之字叔武唐人諱虎爲武萬者謝萬也彪之傳簡文爲相以彪爲鎮軍將軍會稽內史居郡八

年豪右歛迹以忤桓溫免降爲尚書頃之復爲僕射再按興寧三年帝崩廢帝即位是年冬以前

會稽內史王彪之爲尚書僕射據是上推八平當爲升平二年是彪之爲會稽之年溫免彪之在鏡

與寧三年事所推皆同前一年冬十二月以太常王彪之爲尚書僕射時羲之免郡家於會稽故遲叔虎來

也王洽卒有羣從凋落將盡帖

己未三年 五十三歲是年十月慕容雋東阿遣西中郎將謝萬次下蔡北中郎將郗曇次高平以擊

之王師敗績有萬石帖帖云適萬石去月五日書爲慰尋得彭祖送萬九日露版再破賊有所獲

想足摧寇越逸之勢萬本傳無破賊事想亦嘗有小勝史不具耶又一帖云停雲子代萬頃桓公

至今令荀臨淮權領其府。蓋謝萬敗後，欲使雲領其衆而不果。荀臨淮名序，荀崧之弟子，權領事，史無聞。

庚四年 五十四歲。是年桓雲卒。有雲子暴霍亂帖。謝安爲桓溫司馬，有謝司馬帖。又一帖云：上流

近間不竟何日卽路。謝定出居內所宏故重。按本傳：萬黜廢，安始有仕進志。年已四十餘矣。安卒于太元十年乙酉，年六十六。上推本年正得四十一歲。謝萬敗退，正當上年之冬。故知爲司馬在此年也。居內所宏故重者，以謝才望當處朝廷而棄之，征幕非逸少意。

辛五年 五十五歲。是年郗曇卒。二月以鎮軍將軍范汪爲都督青兗徐冀幽五州諸軍事。安北將

軍徐兗二州刺史。有與謝萬書云：若治風教可宏，令當是忠著于上，義行于下，雖古之逸士亦將眷焉。況下此者，觀頃舉厝，君子之道盡矣。今得獲軍還，君屈以伸，時玄平頃命朝有君子，瞭然復謂有容足地，常如前者，雖患九天不可階，九地不可逃，何論於世路萬石，僕雖不敏，不能期之以道義。豈苟且若復以此進退，直是利動之徒耳。所不忍爲。按范汪傳：汪字玄平，辟司空，鄒稼掾。參征西庾亮軍事，徵拜中書侍郎。桓溫代翼爲荊州，以爲安西長史，辭溫還京。簡文作相，甚相親重。徐都督安北將軍，據此逸少與玄平爲幕僚之舊，觀其諫翼北伐及不同桓宣武信自守奇士，朝

有君子不其然乎卒以忤溫廢爲庶人又有范公帖范生帖似謂玄平也。

壬戌 哀帝隆和元年

五十六歲有賀表臣羲之言伏維陛下天縱聖哲德齊二儀應期承運踐登大

祚普天率土莫不同慶臣抱疾遐外不獲隨例瞻望宸極屏管一隅臣羲之言按哀以琅琊入繼大統故表云然若康帝奉顯宗命爲嗣與此表少不相應且其時逸少方刺江州職在藩條何得云抱疾遐外也據此益知卒於辛酉之說爲張氏臆斷也又一帖得司州十六日書諸疾患至憂之至深矣有斷未想桓公數便亦知謝生大得情和至慰安以當至吳興遲見之也按謝安傳桓溫請爲司馬溫當北征會萬病卒安投求牋歸尋除吳興太守再考溫傳伊水戰後至隆和初溫上疏欲還都洛陽卽謝傳所謂溫當北征時也帖中司州謂謝萬萬監司豫故亦得稱司州非王胡之之司州也諸疾患至謂萬病也謝生大得情和溫喜安至歡笑竟日間左右曰頗嘗見我有如此客不意謂桓重安也以當至吳興者萬由吳興監司豫安後復爲吳興太守故當以言爲家矣又帖云聞眞長知吳興想必如意眞長謂劉惔惔妹爲謝安妻此吳興謂安也

癸亥 興寧元年

五十七歲是年四月慕容暉寇滎陽五月陷密城有慕容乃抄梁下帖

甲子 二年

五十八歲有桓公以江州還臺帖按興寧元年加溫侍中大司馬都督中外諸軍事二年

五月以溫爲揚州牧。論溫入朝不從。七月復徵溫入朝。八月溫至赭圻。又使尙書韋灌止之。溫遂居赭圻。固讓內錄。遙領揚州。明年三月移鎮姑孰。江州還臺。謂此時也。

乙丑三年 五十九歲羲之卒

一一 蘭亭觴詠圖記

宋 濂

蘭亭觴詠圖一卷。相傳爲李公麟所畫。觀其運意狀物。極有思致。似非公麟不能。先畫蘭亭一所。俯臨清流。上甚幽艷。四面皆簾。簾半捲。旁周闌楯。中設方几。几上墨硯各一。紙三。二成軸。一布几間。有美丈夫。從几後。冠竹籜冠。服大布衣。右手操翰。冥然若遐思。疑羲之草序時也。後列二童。一侍側。一吹火。爇鼎。鼎水沸。將淪湯。前一童。傍闌睨溪。溪中白鵝三。一去。一反。顧一飛起。波面。則二鵝間。溪皆崇山峻嶺。有水自中出。三級。水西置酒尊四。一童左手執袂。右入尊勺酒。一童執觴。一童執壺。夾左右立。尊前有案。列觴五。觴各有舟。如荷葉。二童執觴流於溪。一童偃立。其後舉觴次第授之。旁有小艇。觴泊岸。觸之使逝。又西有石磴。磴上覆舟一。列觴二。一童執酒注觴中。一童取酒盜飲。次畫郡功曹魏滂。大令王獻之。滂左執卷回顧。獻之伸右手欲受卷。獻之襟袖半敞。左持卷未授。右執翰凝視。將塗竄然。次畫

散騎常侍鄒曇。左右手展卷自誦。次畫樂陽桓偉。餘杭令謝藤。偉坦腹坐。左手掀髯。氣甚豪。右執卷倚大帶間。藤解襟盤礴。詩思久未屬。握拳作欠伸勢。次畫侍郎謝瑰。左持卷當膺。右握翰撫膝上。次畫王凝之。潁川庾友。王渙之。凝之袒兩肩。左手垂硯側。右執卷授友。友袒如凝之。方軸紙作卷。卷末紙參差。以掌齊之。渙之袒如友。兩手抱膝微吟。次畫行參軍事邛邱旄。袒裼如渙之。伸一足坐。舉手取觴飲。次畫餘杭令孫統。琅琊王友謝安。行參軍曹茂。府主籀任凝。統翹左足。又兩手著膝。安翹右足。左手壓硯。令令不動。右楷墨作汁。二人相向坐。茂兩手執紙直垂。輾轉軸之。凝袒衣露左臂。壓膝上。翹一足如統。旋首顧茂。目光炯然。次畫左司馬孫綽。歛衽危坐。若泊然無所爲者。次畫潁川庾蘊。年甚耄。坐久思起。右手據地。一童挾左臂扶之。次畫行參軍楊模。衣半袒。單足起立。屈一足。揚雙袖向前。翩翩如舞。次畫王肅之。鎮東司馬虞說。任城呂系。府主籀。后綿。肅之困睡不可擘。一手燃紙作針。刺鼻令嚏。說袒半衣。兩手展卷讀。系向說。右手據席。左繞出背。後閣膝上。臂露者半。俯首就說作聽狀。綿足心並翹。一足兩手持卷夾膝。身微側。次畫參軍孔熾。袒腹。仰面視霄漢。翹一足。左持卷枕膝。右據地。傍一童伏溪岸。以小艇致觴。欲飲熾。次畫參軍劉密。袒衣坐。左手執袂。右入水。微波動指間。前有觴泛流而下。欲取之。旁有覆觴流去。次畫王玄之。永興令王彬之。郡五官謝繹。王徽之。玄之展卷斜視。露左手。右不見。彬之與

玄之對袒肩坐。伸手借卷。繹亦坦。垂左臂。右執翰。壓臂。臂癢將搔之。微之左擊卷。至觀右操翰。欲寫未寫。次畫府功曹勞夷。行參軍徐豐之。夷豐之相向。夷左執觴。右手夾觴側。若獻豐之。豐之面仰視。揜袖至腕上。勢粗甚。右手向身北取觴。似欲酬夷者。次畫長岑令華蒼。右執觴未飲。左撚髭。旁睨豐之。洋洋有喜色。次畫徐州西平曹華。右執卷側身欲讀。左手隱。次畫王蘊之。鎮國大將軍掾卜迪。司徒左西屬謝萬。彭城曹誼。任城呂本。蘊之箕踞坐。交臂兩膝間。一握掌。一舒掌。掌覆拳背。迪半倚。舉手迎觴欲取。萬肩半坦。左接紙。右在肘下。側目視迪。誼伸右足。左持觴。顧本。本翹一足。屈臂拄膝。持翰貼耳上。頭微仰。若苦吟者。次畫上虞令華茂。山陰令虞谷。中軍參軍孫嗣。茂袒肩。右執翰垂下。欲擲。轉首共谷語。谷袒衣與茂同。右持觴浮嗣。茂拊掌大笑。一足踞。次畫陳郡袁嶠之。行參軍王豐之。豐之展卷仰首讀。背微偃。嶠之雙掌相向舞。似對之擊節者。次畫二垂柳夾石橋。橋有扶闌。二童渡橋上。一持器疑貯觴者。一倚闌。執手指溪中。溪左右各一童。操小艇。邀觴舟收之。其側有覆觴二舟。兩別有一童出柳下。身半露。自蘭亭至石橋。溪水詰曲流。如龍奔。溪右二十人。溪左二十有二人。其中冠者十有二人。巾者三十人。衣皆裘加紳。各地坐。藉以方榻。或熊虎皮。硯紙墨筆各具。有詩者各繫人旁。兩篇成者十有一人。一篇成者十有五人。不成者十有六人。其風流之狀。人人殊。誠可謂善畫者已。今去永命癸丑。不翅千有

餘年計其一時人物之盛清標雅致浮動於左尊右俎間猶可卽此圖以想見其事然而俯仰今昔時異世殊崇山峻嶺固不改於舊而昔人果安在哉後之人欲見有不可得徒想像於圖畫中亦足悲矣噫世間萬事往往如是何足深道唯辭章勞烈足以傳世於無窮其人雖死猶不死也如王謝諸人是已使公麟復生尙得描貌之乎予見此卷於友人家因借歸記其事如右時一觀焉則有不勝感慨者矣。

三 王羲之蘭亭敘今傳各本略述

常任俠

晉右軍將軍王羲之書馳譽當時至唐以太宗好尙推崇備至遂益見重於世蘭亭敘尤爲藝林所寶蘭亭敘流傳於右軍家中前後二百年至隋時傳之右軍七世孫僧智永智永既歿法弟辨才祕藏之太宗召取其後殉於昭陵真蹟遂亡更過百年至宋時定武石刻始著於冊帖考曰「唐本蘭亭敘刻於唐太宗貞觀間太宗嗜書留心右軍之蹟因魏徵言蘭亭敘真蹟在僧辨才處特遣御史蕭翼賺得武德四年敘入秦府貞觀十年始命湯成澈馮承素諸葛貞趙模各臨摹以賜近臣當時褚遂良歐陽詢各有臨本人並崇尙然二人自出家法不復拘拘書畫後之所謂定武本歐臨是也所謂唐絹

本。褚臨是也。遂迴分二派。互爭雄長於宇宙間矣。彼時歐石刻於禁中。最稱難得。每本已值數萬錢。迨後石晉之亂。契丹輩石而北。棄於殺胡林。慶曆中爲李學究所得。其子負官價無償。時宋景文守定武。乃以帑金代償。納石於庫。熙寧間薛師征出牧。刊一別本以應求者。此郡都膺已有二派矣。其子紹彭字道祖。又模之他石。潛易古刻。又剔損古刻湍流帶左右五字爲識。（一曰湍流帶右天）大觀中詔向其子嗣昌。取龕宣和殿。其後靖康之亂。宗汝霖爲留守。猶馳進高宗於揚州。倉卒竟失所在。據此則右軍真蹟既亡。歐臨古刻亦失矣。自薛紹彭始。摸刻定武蘭亭。天下翕然效之。至南宋時已達數百本。故朱晦翁遂有蘭亭聚訟之言。今傳於世者有列各本。

一、故宮博物院藏定武蘭亭真本。此爲散宮所藏蘭亭八柱之最善本。卷中有政和元年王徽題識。蓋定武原石。自薛氏入內府時。王徽方在政府。因而得之。至元入康里子山手。清時畢秋帆得之。畢氏籍沒。此卷又入清府內。卷中宋人題識之外。又有鮮于伯幾、趙子昂、袁清容、鄧善之、虞伯生、康里子山諸人跋。又有元遺山印記。蘭亭聚訟歷數百年。真贋終不能辯。此本出自宋內府。以政和間人題政和間榻本。自不應有誤。此外當爲定武祖本。或無疑義歟。

二、故宮博物院藏宋榻定武蘭亭趙氏藏本。此卷幅後有趙孟頫自臨蘭亭跋。并明王紱清王文

治諸人題跋此卷石紋剝損處與前卷相合蓋同出一石此其別一本也但較之前卷所損較少且更清晰耳。

三、定武蘭亭吳炳本卷首有宋楊定武蘭亭瘦本吳炳舊藏題簽卷末有王容吳彥暉張紳王文治等明清諸家題跋王夢樓跋云「亦是薛道祖另刻本耳此本點畫之中含異趣行墨之外別具風神殆生平所僅見者」此本神貌略同故宮本。

四、蘭亭敘開皇本隋文帝開皇十八年三月廿日刻字體古樸厚勁與他本不同又別有開皇十三年本明邢子愿刻楊氏平帖記曰「按此二本原拓今俱藏歸安吳平齋家平齋皆刻之于石今所傳拓本或卽其所摹」

五、定武蘭亭獨孤長老本昔趙子昂於旅中得獨孤長老惠此帖後真跡及宋元人跋語均被火災燒殘翁覃溪題爲「蘭亭獨孤本並跋殘字」趙書十三跋於後有云此卷乃至佳五字餘損肥瘦得中與王子慶所藏趙子固本無異石本中至寶也」

六、定武蘭亭韓珠船本道光時韓榮光藏石損處與故宮本同榻似較後。

七、定武蘭亭國學本明萬曆間（一說宏治）出天師菴土中收存國學故名又別稱國子監本。

或北京本。

八、定武蘭亭東陽本。佩文齋書畫譜曰：「近年揚州發僧舍地，得二石，皆蘭亭舊刻，一缺其前，一缺其後。運使何士英裁齊之，合而爲一。故又稱何氏本。前者存十八行，後者存十行。兩本肥瘦相近，清韻可愛。世傳宋思陵（太宗）曾瘞此石云。」

九、定武蘭亭柯丹丘本。第一行缺處，有元柯九思印。五字已損，墨色紙質，與獨孤本相似。有正書局影印。稱定武蘭亭瘦本。石損處與故宮本略同。

十、定武蘭亭游似本。宋南渡後，宰相遊景仁似收藏蘭亭百本。此本卷尾有遊似鑑賞印。

十一、定武蘭亭落水本。舊說宋趙孟堅子固，自俞壽翁家取姜堯章舊藏蘭亭敘，途次泛舟過嘉興，遇風舟覆，子固急呼曰：「蘭亭在否？」舟人負之出。後子固跋中記其事，並題八字曰：「性命可輕，此寶難得。」一時好事者傳爲佳話。因名落水本。趙子昂十三跋中亦記其事。舊藏清成親王貽晉齋中。石損處與故宮本略同。

十二、唐摸蘭亭神龍半印本。此帖首尾俱有神龍半印，故名字有褚遂良臨摸說。三希堂帖於此同，題爲馮承素書。未知孰是。董玄宰謂蘭亭爲右軍行楷第一。今此唐榻石印蘭亭，宜置班首。楊守敬

平帖記稱其摹勒最精。日人富岡三井各藏一本。石理相合。

十三、褚摹蘭亭。吳榮光本。自穎上長治石出土。褚模蘭亭摹刻續出。真本遂不能識。此帖後有米元章跋及贊跋云：「在米姓口口下法書第一。唐太宗既獲此書。使馮承素韓道政趙模諸葛貞之流。模賜王公。褚遂良時爲起居郎。蓋檢校而已。此軸在蘇氏命爲褚模。觀意易改。致誤數字。不是褚筆。落筆直書。餘皆雙句。清潤有秀氣。轉摺芒鏗備盡。與真無異。非知書者所不能到。世俗所收。或肥或瘦。乃是工人所作。正以此本爲定。」其後各家著錄意見。皆認爲正本。吳荷屋藏舊拓。題「宋拓褚模蘭亭。敍袖珍本二。筠清館藏。」前後附跋。並與王覺斯等兩臨本合。但觀其神致。似與三希堂褚摹蘭亭有異也。

十四、褚模蘭亭袖珍本。明董其昌以蘭亭半截之作爲小形法帖。名曰袖珍蘭亭。海甯陳氏刻於渤海藏真帖中。內缺六行。帖中崇山峻嶺之領字加山。故此又稱領字從山本。

十五、褚模蘭亭真蹟本。有米元章跋及莫雲卿王世貞等名流鑒賞題識。但與其他褚摹蘭亭相比。其法微異。

十六、蘭亭敍穎上本。此本爲唐臨絹本。瘦勁秀美。鐫刻亦精。帖題曰「穎上井中。突放光如虹。縣

令異之使下探得蘭亭及六銅壘。說與昔潁縣志所記略同。此石出後，縣令貪而不仁，自拓多本，雖石碎之，今殘石存縣南楊氏家。縣令卸任後，中途遇盜，拓本皆被焚，故整本殊不易得。今拓皆殘片，明嘉靖時與黃庭經共刻一石上，中缺二十七字，原石頗似褚摹，翻刻甚多，善本殊難得。

十七、蘭亭敍張金界奴本。此帖尾有「臣張金界奴上進」數字，故名。餘清齋、秋碧堂得皆刻之。傳爲虞世南臨本。剛柔得中，在各蘭亭帖中，別饒勝韻。


十八、蘭亭敍洛陽宮本。此本刻於快雪堂中，題云「蘭亭序正本第十九洛陽宮賜高士廉」。貞觀十二年潤二月癸未書。故稱洛陽宮中。董其昌跋云「唐太宗得辨才所藏蘭亭，命馮承素輩摹賜親王大臣，已有肥瘦同中之異。至於臨寫，楷中令特。卷此卷爲第十九本，賜高士廉，曾入元文宗御府，柯九思鑒定。上海顧中舍從義家傳第一本爲海內冠」。此中領字從山，袖珍蘭亭與之相似。

十九、蘭亭敍賜潘貴妃本。此帖亦同洛陽宮本。前書「蘭亭序正本賜潘貴妃」，故名。滋惠堂彙其同類者，刻爲唐集右軍書。楊守敬云：「此本爲好事家僞帖。」

二十、蘭亭敍虞撫本。此本爲虞永興臨書。本立堂鈎勒上石。

以上略舉蘭亭二十本。歐模、唐模、虞模及其他模本，神貌多異，不知誰爲右軍本來面目。世崇右

軍蘭亭。蘭亭果何似乎。右軍在晉代。生於王謝望族。煊赫當時。既係司徒王導從子。又爲右軍將軍會稽內史。所居既高。易得衆望。加以積學不倦。兼羅衆長。初擅隸書。及渡江而北。遊名山大川。見李斯曹喜書。至許下。見鍾繇梁鵠書。至洛下。見蔡邕石經三體書。初學書於衛夫人。後乃並習衆碑。妙集諸善。當其早年。不能勝庾亮郗愔。晚乃達於妙境。藝術大成。殆非偶然。且位既顯達。流播自易。爲舉世之所尊。亦衆因之所匯也。崇揚右軍。無過於唐之太宗。毀滅蘭亭真跡。亦由於太宗。一代統治者之好尚。遂成風習。傳播至今。坐令臨摹翻刻之輩。紛紛並出。晦翁蘭亭聚訟之語。蓋至今而未已也。



版權所有
翻印必究

中華民國三十七年二月初版

王羲之研究

全一冊 定價國幣四元二角

(外埠酌加運費匯費)

編著者 沈子善

發行人 蔣志澄

印刷所 正中書局

發行所 正中書局

(2233)

校整：海
：自

滬·本

2/1-0.05

H O Sc
431118



4.20

26